

# KWENDELEKWA

## NAMAMBO A KYAMBO



Nakusachila, Mulongo Neville.

Naambile kwi Mulongo Neville, “Kine anweba kechi muji na kushingwa kucheche lukeelo luno ne?”

<sup>2</sup> Amiwa naishile na kulombelela bakolwa. Kwajinga bantu bamo babungakene monka atweba. . . ja pa Mulungu lukeelo. Kyo Nakonsha kukwata kokwa, Amiwa nebambilatu baiya kuno ku kipwilo. Kabiji Amiwa—Amiwa kimye kyonse ndanguluka mba kyawama bingi kulombelela bakolwa ku kipwilo. Amiwa kechi nayuka ne. Natemwa kipwilo, kabiji ne kwiya kuno ku kipwilo, kuji bantu babena kulomba.

<sup>3</sup> Kabiji kwajinga nsongwakazhi mucheche kunyuma kokwa, nsongwakazhi mucheche walamba bingi, kika, Nalanguluka mba waikala kuntu kumo muno pa kino kimye, inge bantu kechi bakuya ku nzubo ne. Oo, Namona pa kino kimye. Kabiji ao ke kintu kyakila kuwama bingi. Kabiji wakolwa bingi. Kabiji twatelekelenga, byo twaumvwine mbila ya jimi ne kulumbulula byaambiwa. Kabiji twatelekelenga, kabiji twalangulukile mba kintu kimo kyaambiwa pa nsongwakazhi mucheche. Kabiji twapembejilenga kumona kana Nkambo wapana mbila, ya kwamba monkamwa. Bino Nalanguluka mba awa nsongwakazhi wa mucheche ujitu bulongo pakino kimye, kabiji usa kwikalatu bulongo. Kabiji nanchi. . .

<sup>4</sup> Kabiji kwajinga inetu wabujile meso, ne aye, kabiji twamulombelejilenga. Kabiji ne mwanamulume umo wajinga momwa mu abbulasi, wamwingilo. Amiwa kechi nalanguluka mba awa muntu wanemene kufika pa sate-faivi paundi ne, nangwa foote. Kyajinga—kyajinga bingi, bingi. . . Kabiji nanchi Naishile na kwibalombelela.

<sup>5</sup> Kabiji ene mambo oo Najinga wanemenena, kyabaya bingi, kutaata kwaumvwanyikile mu jino. Kabiji Amiwa mwine nakwiyichilanga mulozhi, lukeelo luno, pa kikene kyami, palutwe papo. Kabiji bambuula mba Nafwainwa kwi afumyamo, kabiji ne kubikapo byapeulu. Kabiji abwe bukote bubena kwiya, kyo kyonka kintu kyo Nayuka. Kabiji Nekyumvwinenga akya kimo, kabiji ne lubaji lwakyo lwa afu, kabiji byo Natatwile kwamba, mwakonsha kwikumvwa, mwela wapichile, anweba—anweba mwayuka Monekitazha, kulupukila pa mivumbo yenu. Kabiji kikulengela kupusa, nobe byobya.

<sup>6</sup> Atweba twi bantu bashukwa bingi pa kwikala na bumi lukeelo luno, kabiji ne pa kukonsha kwiya ku kipwilo. Kabiji

pa bubwe bufuku bwa kutwala ku Kimishimishi, kupembelela kusekelela kobaji nako, ako, Na—Naketekela Ami . . . Muji baana bavula muno lukeelo luno, nanchi Amiwa nsakuzhindamatu. Mwamona? Kabiji atweba bakulumpe, bimye bimo, twaamba bintu abyoo baana babacheche kechi bafwainwa ne kwibiteleka ne, mwayukatu.

<sup>7</sup> Bino, Nalanguluka mba kipwilo kiji na kicheche kyakupana ku baana babacheche muno, kimye kicheche palutwe. Amiwa na kwikimonangatu, kunyuma kokwa. Oo, mubena kukeba kwikala. Panyuma ya sukuulu wa Pamulungu, anweba pembelelaitu, mwamona, mambo Na—Nalanguluka mba baji na byakupana kunyuma kokwa ku balunda babacheche, byakupana lukeelo luno. Kabiji Amiwa . . . Anweba balunda bacheche, vulukai, kimye kyo tubena kuuba bibye, Nasaka kutokeshapo pa kikye, kechi Santa Claus ne, mambo ajo ke jishimikila jo mukafunda juba jimo amba kechi jijipo na kintu kimo ne. Bino jafuma kwi Yesu Kilishitu, Bukine bwa bukine bonse, mwamona, Mwaana wakwa Lesa. Kabiji tubena kupana kikye kyabupe, lukeelo luno, mambo kibena kwi muyukisha mba kimye kimo Lesa wapaine kyabupe kyabaya bingi kyafwainwa kupanwa ku mutundu wa muntu: Mwaana Wanji. Kabiji tuji na jishinda jatama, ja kwikimweshishamo. Kabiji kafwako kyo twakonsha kupana kwesakanya pamo nakyo ne. Bino nobe bantu, umo ku mukwabo, tuuba byoobyoo.

<sup>8</sup> Bino, Amiwa nafwajilwe kupembelela poso Pamulungu ubena kwiya. Kabiji Amiwa kapepo, nangwa byonkabyoo, pa kintu kimo kyo Nakebelenga kwambapo. Kabiji kintu kimo kya—kya yukanyikwa kwi atweba, ku muzhi, kya kimwesho, kyo Nafwainwa kulondelela. Kabiji kijitu nobe . . . Kijitu nobe, kyamweka nobe, kyakonsha kwikala kyakosa, bino kechi tubena kukeba kulanguluka mba akya kyaamba Lesa kyakosa ne. Byanji—Byanji bisendwa byapela.

<sup>9</sup> Kabiji byo kiji Pamulungu ubena kwiya, Lesa inge waswa, tukekala na—na mpwijilo kuno pa juba Jalondakana na Mwaka Mupya, inge Nkambo wituswisha kwikala na kukwe kupwila. Kabiji tubena kukeba kwikala na mpwijilo ya lukeelo, milombelo ya bakolwa, kabiji kapepo ne lubatizhilo lwa mu meema. Pano Nalangulukile mba, twikibuulang'ane ku balunda netu, pakuuba mba bakeye kuno. Nanchi potukekala na Pamulungu lukeelo kabiji ne Pamulungu bufuku. Kabiji nanchi bantu bakeba kukiisha kutwela mu Mwaka Mupya, kabiji twaikala na . . . Tukekala na Koloko, pa kikye kimye? [Mulongo Neville waamba mba, "Ee."—Waku.]

<sup>10</sup> Kukekala ba mingilo bavula bingi kuno, bakasapwilanga pa bufuku bwa Mwaka Mupya, kufikatu ne pakachi ka bufuku. Kabiji—kabiji twaita aba bamingilo kwiya na kusapwila. Aye Nkambo inge waswa, Nasaka kwikala umo wa mwiabo uji na kintu kimo kya kwambapo pa bufuku bwa Mwaka Mupya.

<sup>11</sup> Kabiji pano Pamulungu walondelapo, Nalangulukile mba Nakonsha kuleta ndonda ya bintu bibena kubiwa, abyo byaubiwa, kumwesha Lesa byo abena kwingila na bantu Banji, kabiji ne kwikileta kufika po—po kyapelela ku kino kipwilo.

<sup>12</sup> Kabiji anweba bavula mubena kukumya na mambo jashi ja musoko jo tubena kupitamo. Japwile. Kabiji pano Mbena kukeba kwimubuula byo kyamwekele, ne akyo. Kabiji Nalanguluka mba, kyafwainwa kwikala, ne kwijibulang'ana jibiji, Pamulungu ubena kwiya, nanchi Amiwa nsakupembelelatu pa Mulungu wiya. Kabiji kweseka kwamba kwi anweba pacheche, lukeelo luno, kufuma mu Kyambo. Mwamona? Kabiji Pamulungu walondelapo, Amiwa ke—keseka ku, inge Lesa waswa, kwi mubuula byo kyaubiwe, kabiji ne kwimuletela byonse bintu abyo Nkambo byo aamba, kabiji ne kwibimona byafikizhiwatu bulongo, byabikwatu pantu pabyo. Mwamona? Aye kechi ubulang'ana kintu kyaya mungi ne.

<sup>13</sup> Bino, pano, kintu kimo kyo Nakeba kwamba lukeelo luno, akyo kapepo kechi Nakonsha ne, kechi kisa kubiwa ne kanatu pa Mulungu ubena kwiya, ke na mambo a kintu kimo kyamwekele keesha japita. Amiwa najinga wakwibwelamo pakikye lukeelo luno, mambo Najinga wauba nobe wakokelela, pakuuba mba Na—Nabula kwikyumvwina muyewa musango. Bino byokiji mba Amiwa nji pano, kyawama, Amiwa nsakweseka mo Nakonsha kubila.

<sup>14</sup> Bufuku bwalondaka na bwapita, Najinga na balunda, Mulongo ne Nyenga Sothmann, nobe byo twayuka muno, umo wamatulasiti wa mu kipwilo, ne bakazhi banji, baishile na kupepula bakazhi ne Amiwa. Kabiji tubena kwamba pa mbung'eno ibena kwiya ku Phoenix kabiji ne kuzhokoloka, inge kyakonsha kwikala kyaswa muchima wa Nkambo. Kabiji twajinga konka poso pepi nobe teeni-sate, Naketekela, kabiji Naile pa mwanya nobe ku leveni.

<sup>15</sup> Kabiji kimye kimo mu bufuku, Nalotele kiloto. Kabiji mu kikye kiloto Namwene muntu umo wafwaijilwe kwikala ba taata; mukatampe, muntu wabaya, wapasha nobe, mwaila kwamba, bataata. Namwene mwanamukazhi, kechi wamwekelenga nobe ba maama ne; bino, nangwa byonkabyo, wafwaijilwe kwikala ba maama. Kabiji ne yuwe mwanamulume (wafwaijilwe kwikala bataata, balume bayuwe mwanamukazhi) wa mumanyikile na muchima wanshinta, kyakuuba mba wajinga na kichi kyabaya, kabiji ne kumushikula nobe *bibye* kabiji ne kumupuma na kikye kichi, kabiji wapona ne kuya panshi. Kabiji pano—kabiji pano, pakupitapo kimye, wakonsheshe kubuuka jibiji. Kabiji aye wakonsheshe kwendauka, kabiji wamwesha nobe ubena kukeba kumupuma ne jikwabo, wamupuma ne jikwabo. Kabiji Naimene palepako, nakumutajisha.

<sup>16</sup> Kyapeleleko, Nekinkiminwe. Kabiji Najinga wachepa bingi pa kwesakana na yuwe mwanamulume, ao wajinga nobe bataata. Nanchi Naendeleko kuya kwi aye ne kubika munwe wami mu kilungi kyanji. Naambile mba, “Kechi umupume jibiji ne.” Mwamona? Kabiji byo Naubile byobyoy, kintu kimo kyatatwile kumweka. Mikoko yami yatatwile kubaya, kabiji Nabaile, misunyi yangovu. Amiwa kechi nakimonapo misunyi yabyobya ne. Kabiji Namutoleletu awa mwanamulume ku teneshi, kabiji Naambile mba, “Kumupuma jikwabo ne. Inge wikyuba, usakwingila ne amiwa inge wamupuma ne jikwabo.” Kabiji awa mwanamulume wanchiyine amiwa, kabiji wamushiile buke. Nabukile ne kubuka.

<sup>17</sup> Kyawama, kasa nalala popa, mu kimye kichechetu, mambo, kulumbulula kwa kyokya kwaishile. Akyo kyajinga, nangwa byonkabyo, mwanamukazhi, mwailatu kwamba, ke Kipwilo, akyo kiji pamo nobe maama. Awa taata ke dinominesheni uji peulu yanji, akyo kiji na luusa pa Kipwilo, nobe mulume pa mukazhi. Kabiji ke aao madinominesheni abena kupuma Kipwilo, kabiji kechi wakonsha Kumuleka Aye kwikala kumaulu byobya ne. Bino, kimye kyonse Aye kyo akeba kubukapo nangwa kubapo kintu kimo, abo, bantu baji momwa, awa dinominesheni Wamushijikila panshi. Kabiji kyalumbulula kubikapo—misunyi ya lwitabilo lumo yalupukamo kasa natwajijila na kumubika munwe wami byobya, ne kwaamba mba, “Obewa usakwingila neamiwa. Mwamona?” Mambo, amwa muji bantu bamo bakwa Lesa. Kabiji akyo kijitu bulongo. Pepi . . .

<sup>18</sup> Twajinga pepi nobe ma awala abiji, nangwa asatu, byo Naketekela. Kabiji mwaanami wamukazhi, umo wa mwi abo, Rebekah, kunyuma kokwa, wingila mingilo pa Kipatela kya ba Methodist mu Louisville. Uji, oo, na kufunda mwingilo wa bumanase. Ke “bakukasa bilonda,” byo bebatela, nangwa kintu kimo kiji byobyoy. Kabiji aye wajinga, aye . . . Bamwichile mba eye alwa lukeelo, kabiji akyo kyo kyambushishe. Kabiji kyajinga lukeelo, kabiji aye, na mukwabo mucheche wa kusukuulu kuno, abo—abo bengila pamo konka kwa, kabiji nebatwajilenga ku Louisville. Bafwajilwe kwikala konka pa teni koloko. Kabiji bakazhi bakuminye pa kukakalwa kutwela ku kibamba kya kumwanya. Nakomenemo.

<sup>19</sup> Bino, Njina bintu byavula bingi bya kumwekela mu bumi bwami, bino Amiwa kechi nakikalapo na kintu kimo kya musango yewa ne. Naponejile mu kimonwa. Amiwa kechi nayuka kilumbululo ne. Amiwa kechi nakikalapo na kintu kimo kiji byobya mu bumi bwami ne. Bino, kumeso ami, kyamwekele nobe Navulukile mba kyajinga kimonwa, kabiji Najinga mu kimwesho. Bino Naambilenga ku mwaana wami, Yosefwa. Ao, pakyokya kimye aye kechi wajinga mu kibamba ne. Bino mu musango umo, byo kyaishile kwi amiwa, Naambilenga kwi

Yosefwa.

<sup>20</sup> Kabiji Na—Natajile peulu. Kabiji kyajinga nobe mumusango wa pilamenda, kasa twaimana kumeso ami, twajinga tuheche, tung’onyi tuheche, kintu kimo kyalepa nobe afu-inchi. Kabiji twajinga, peene peulu, pa misapi, apa pajinga . . . ng’ambe mba, basatu nangwa foolo. Pano, kyalondelapo, musapi walondelapo wajinga na kapepo eiti nangwa teni. Kabiji peene panshi, pajinga fifitiini nangwa tweti.

<sup>21</sup> Kabiji twajinga tumazhita tuheche, mambo akuuba mba mayona ato achibaikile, kabiji kyamwekele nobe tubena kukeba kwamba kwi amiwa, kwambapo kintu kimo. Kabiji Najinga ku Muzhika, kyamwekele nobe ku Tucson, Arizona. Kabiji bang’onyi batajilenga ku Musela. Kabiji Natelekelenga pepi bingi. Twaesekelenga kwamba, kyamwekele nobe twakebelenga nkumbuula kintu kimo. Kabiji twajinga na mayona acheche, onse ajingatu avuyauka, ne bintu bikwabo. Twajinga twawaina bingi na mwekelo-yankondo. Kabiji, ponkapotu, umo ng’onyi watatwile kuya pa musapi paikala mukwabo, na kutoloka *byoby*a. Kabiji ato, atwa tung’onyi tuheche twaile lubilo, twatumbukile kuya ja musela.

<sup>22</sup> Kabiji byo twayile, kufuma popa kwaishile bang’onyi babaya, baji nobe bankunda, na byapi byatwa. Kabiji—kabiji—kabiji bayishile mu mutema, kabiji bukijitu, twanyemene lubilo kukila ne tung’onyi tuheche byo twajinga, batumbukile kuya ja musela.

<sup>23</sup> Kabiji Nakijingatu mu . . . kapingu yense ubiji wajingatu pamo, Nayukile mba Naimana popa, kabiji Nayukile mba Njikutu kukwabo. Mwamona? Kabiji Nalangulukile mba, “Pano, akye ke kimwesho, kabiji Nafwainwa kufunda kiky byo kyalumbulula.”

<sup>24</sup> Kabiji jibumba ja bubiji ja bang’onyi kasa jikyangye kwiya ne, Natajile ku Muzhika. Kabiji kyamwekele nobe mu musango wa pilamendi, nobe babiji ku lubaji lumo, ne umo peulu, kwaishile faivi Bamalaika babulume abo Bokyangye kumonapo mu bumi bwami. Nalubilo lwabaya bingi, lo Nabula kumonapo. Mitwe yabo yabwela lunyuma, kabiji byapi Byabo byasongoloka, baendelenga lubilo! Kabiji bulume bwa Lesa Wabulume bonse bwakwachile, mujishinda jakuuba mba, poso byo Bwashikwile kufuma panshi, kufumya panshi, peulu.

Nakonsheshe kumvwa Yosefwa kasa abena kwambatu.

<sup>25</sup> Kabiji kilulumo kyaumvwanikile nobe kikuwila, akwa-akwa kululuma kwavumine, misiso yalepa kufuma po bajinga, kuya ku Kabeta kabulenge. Kabiji byo Bashikwile . . . Kabiji kwajinga lubilo lwabaya bingi lwa Bamalaika! Kabiji Na—Nakonsha Kwibamona ponkapano, mwamona, byo—byo Baishilenga, mu yewa musango *byoby*a, kwiyatu lubilo kwi amiwa.

26 Bino, kechi kulota ne, pano. Ine. Amiwa najinga ponka, kasa mbena kulaba byonka Byonji pakino kimye. Mwamona?

27 Bino Abo byo baishile. Kabiji Bajinga bingi lubilo, poso byo Nalangulukile, byo Banshikwile peulu. . . Naumvwine kyavumine, nobe, nangwa nobe kintu kyamvuma, nobe kikuwila kya kilulumo. Kabiji byo kyaubile, Nalangulukile mba, “Kyawama, akye kyafwainwa kulumbulula mba Amiwa mbena kwipaiwa, monai, mu kyokya kilulumo.” Kabiji—kabiji Amiwa naubiletu. . . Byo Nalangulukile pa bibye bintu, Nalangulukile mba, “Ine, kechi kyakonsha kwikala byobyoye ne. Mambo, inge kyajinga kumvuma, kyakufwainwa kusenda Joseph, ne aye. Mambo, ukiji popa, ukyambatu, ubena kulanguluka mba Amiwa kiji ponka. Nakonsha kumumvwa. Kechi kyajinga byobyoye ne.”

28 Bino, abye byonse bikijitu mu kimwesho. Kechi byokyajinga ne. . . Mwamona? Kyajinga mu kimwesho.

29 Kabiji pano, pookapotu, byo Nalangulukilenga mba Najinga. . . Bazhokolokele. Amiwa kechi ne Bamwene ne, bino Naletelwe mu konka kang’umbwang’umbwa ka pilamenda Yabo, mukachi ka kanko kang’umbwang’umbwa ka—ka Bamalaika, baji faivi. Kabiji Nalangulukile mba, “Pano, Malaika walufu wafwainwa kwikala iye. Faivi ke lusa.” Nalangulukilenga kyokyo. Nalangulukile mba, “Oo! Ba—Babena kwiya na Mbila yami. Akya ke kimye kyami kyakukajila kya bubiji. Babena kwiya na kundetela Mbila kufuma kwi Nkambo.” Kabiji Nabijikile nabulume bwami bonse, najiwi jikatampe monka mo Nakonsha kubila, “Anweba Yesu, kika kyo mwakeba Amiwa mba ngube?” Kabiji byo Naambile byobyoye, Kya—kya fumine kwi amiwa.

30 Ami—Ami—Ami kechi naumvwa bulongo ne, kufumatu ponkapa. Mwamona? Najinga, juba jonse keesha japita, Naiketetu mu nzubo, pepitu kubuula kwiumvwa bu muntu ne. Amiwa milanguluko yami kechi yakasuluka ne. Kabiji lukumo ne bulume bwa Nkambo! Amiwa naubile kifwe mubiji yense, byo Kyafumine pe amiwa. Naesekelenga kushitaula maboko ami. Kabiji Nalangulukile mba, “Amiwa kechi nakonsha kupema bulongo ne.” Kabiji Naendele kuzhokoloka, na kuya mwaya nzubo, na kuya kulutwe ne kubwela lunyuma. Nalangulukile mba, “Kyaila muka kye, Nkambo? Kyaila muka kye?” Nanchi, Naimene. Naambile mba, “Nkambo Lesa, kalume Wenu uji. . . Amiwa—Amiwa kechi nakonsha kukwatakanya ne. Kika? Kyajinga kika? Kingyukishai, Nkambo.” Kyawama, inge aye. . .

31 Amiwa kechi nakonsha kwimubuula pa kikye ne, inge Naamba mba, “Bulume bwa Nkambo.” Kechi kujipo jishinda ja kulondolwelamo ne. Kechi kyokya kyomumvwa ne, mu mapesho. Ao ke mapesho akwa Nkambo. Akye kyazhila! Oo, ami! Ke—ke kyakila pakyokya kintu bumuntu kyo bwakonsha kulanguluka. Mwamona? Kabiji ki—kibena kukatazha bingi, kyatama bingi.

Kechi kiji. . . Kechi mapesho ne. Ke kintu kikatazha. Obewa wakatazhiwa. Mwamona? Byokiji. Inge wakonshatu. . .

<sup>32</sup> Inge Nakonsha kwikala najishinda Jonakonsha kubuujiilamo bantu byo kyajinga, nangwa byokyaji. . . byajinga ng'umvwanikilo yakyo! Kiji, kechi kiji nobe kwikala muno, ne kukeba kusangalala ne. Ke—ke kintu kimo akyo mishipeshipe mwi obewa. . . Kyakila pa kuchinyisha. Kyakila pa kulenga moyo. Ke munema wazhila. Wa. . . Ami. . . Kechi kujipo jishinda ja kwikilondolwelamo ne. Kufika, poso, nyuma yami yonse, peulu-ne-panshi ya longololo wami, kupita ku minwe yami, peulu-ne-panshi kufika ku maulu ne mana ami, bumuntu bwami bonse bwaubiletu kifwe, monai, kijitu pamo nobe—nobe wafuminemo muntanda, kuya kuntu kumo. Kabiji—kabiji nkyashilenga, bitende bitende, kabiji Naambile kwi—kwi Nkambo namba, “Anweba Mwakonsha kungyukisha amiwa nyi, Anweba Lesa?”

<sup>33</sup> Nalangukuka, mba, pokyajinga pepi kwikala kyakonsa byobya jibiji, kyajinga kimye kyo Najinga mu Zurich, Switzerland, kimye Aye kyo amwesheshe awa Mpungu mwina German watajilenga pa yewa mu English wenda-pa mbili wayishilenga kupita mu Africa. Kabiji Aye waambile mba, “Bonse balenga mambo ne kufika ku lukumo ne.”

<sup>34</sup> Kabiji Najijilenga kwi Nkambo, namba akwashe. Kabiji Na—Nasaka namba Aye ampe kilumbululo, mambo Nakuminye kana kyalumbulwile mba—inge kyalumbulwile mba Mbena kuya na kufwa, Mbena kuya na kwipaiwa. Kabiji inge byo kiji, Amiwa kechi nafwainwa kwambapo nangwa kintu kimo ku kisemi pa kikye ne. Ke kimye kyami kya kuya ku Nzubo, kika, Amiwa nkayatu ku Muzhi, kyo kyonka. Bino inge—inge akyo byo kyalumbulula, Amiwa kechi nakebelenga kubuula kisemi ne, kechi nakebelenga abo kuyuka nangwa kimo pa kikye ne. Kwikilekatu kyaubiwa, kabiji akyo kyakonsha kwikala kyo kyonka.

<sup>35</sup> Naambile mba, “Nkambo, nkwashai ami. Amiwa kechi nkeba kubulang'ana ku kisemi ne, inge—inge Byokiji. . . Akye, ke lwito lwami kuya ku Muzhi, kyawama, Amiwa—Amiwa mbena kuya.” Mwamona. Naambile mba. . . Kabiji, mwayukatu, obewa uji. . .

<sup>36</sup> Mwaamba mba, “Kyawama, kika kyo wabujiile kulangukuka pa byo waambile mu kimwesho, byaambile kimwesho?”

<sup>37</sup> Bino kechi wakonsha kulangukuka pa bintu bya musango yewa ne. Anweba. . . Amiwa kechi nakonsha ne, nangwa byonkabyo. Kabiji Nalangukukile mba. . . Nakatazhiwetu, nazingijile. Obewa kechi wayuka mwa kulangukukila ne. Obewa kechi wakonsha kulangukuka ne.

<sup>38</sup> Kabiji Naambile mba, “Taata wa Mwiulu, inge akya kyalumbulwile mba—mba akwa kuvuma kwa kusenda ami,

kyawama, lekai amiwa ngyuke pano, pakuuba mba Amiwa kechi nsakwambapo kintu pa kikye ne. Lekai lukumo Lwenu ne bulume biiye jibiji pe amiwa, kabiji ne nkushikula jikwabo. Nangwa, lekai lukumo lwenu lwiye pe amiwa, kabiji Amiwa—Amiwa nsakuyuka mba kyalumbulula—kyalumbulula mba, kabiji nanchi Nekilametu amiwa mwine.” Kabiji kafwako kyamwekele ne.

<sup>39</sup> Nanchi pano Naambile mba, “Nanchi, Nkambo, inge kyalumbulula mba Anweba mukatuma Baluwe Benu na kupa mwingilo, nanchi lekai bulume Bwenu bwiiye jibiji.” Kyaubile nobe kyafumya mu kibamba!

<sup>40</sup> Nangwatu, Na—Nabwela mu bututulu bwami, na Baibolo mu kuboko kwami, nanchi, monai, kabiji ne kumwipuzha Lesa amba akwashe. Kabiji byo Naubile, Aye—Aye wamwesheshe kintu kimo mu Kinembelo, kyapasha kwi akyo, ponkapa. Kabiji Nalangulukile mba, “Bushe akya kyakonsha kwikala byobya nyi? Pano Naubile byepi kyokyo?” Kabiji, oo, Amiwa—Amiwa kechi nakonsha kulondolola bibye bintu ne, balunda. Kyakila pa byo Nayuka. Mwamona?

<sup>41</sup> Mukazhi wami ke mwanamukazhi umo wapusanako bingi, umo wakila mu kuwama pantanda. Bino, pa kakimye kacheche, kechi Naambilepo kintu pa kikye ne. Natwajijiletu na kuya kulutwe. Aye wayukile mba kujipo kintu kimo kyamweka. Nanchi byo Namubuujiile, waambile mba, “Wayuka, Bill, Nkumona kabiji ne kukumvwa obewa, mu bintu byavula.” Waambile mba, “Wayuka Nakuketekela na muchima wami yense,” byo aambile. Aye waambile mba, “Bino akyo kyajinga na kintu kimo.”

<sup>42</sup> Kyamwekeletu, kyasukenya, akwa kuvuma ne kwiya lubilo kwa booba ba Malaika, kwiya pamo kwa booba faivi, mu—mu kang’umbwang’umbwa nkabo. Nobe, kiji nobe—nobe byo Najinga na yoya pilamenda yalengelwe muno, mwamona, bamwekele nobe, patanshitu nobe, musango wa . . . palepa, bamwekele pamo nobe mushobo wa bankunda. Kabiji bayishilenga ku—kufumina ku *lulwe* lubaji. Kabiji bajinga, bamwekele nobe, umo, babiji; basatu, foolo; kabiji mukwabo wajinga peulu, monai, kulenga faivi. Kabiji bayishile lubilo lwabaya bingi! Kafwako kiji byobya ne, kafwako mandeke, kafwako nangwa kimo kyakwesakanya *nakyo ne*.

<sup>43</sup> Kabiji Nakonsha kwibamona, ne mitwe yabo iji nobe yatala mumwe-mumbaji. Abya byapi byasongoloka kutala kunyuma, mwekelo-imo, kabiji byobyo bayishile, nanchi mba “Wii!” Nobe *byobya*. Baiyatu ponka panajinga, kabiji ne nkushikula mukachi ka iye pilamenda ya kang’umbwang’umbwa kaabo. Namwene mba Nashikulwa, kufuma panshi. Nalangulukile mba kape. . . Naumwine, kuya palepa, akya kikuwila, “Whoom!”



Nobe aya—aya—aya ndeke ya kilang’anya pa kikuwila, anweba mwikyumuwapo muyekao musango, nobe kikuwila.

44 Nalangulukile mba, “Akye kyakonsha kulumbulula mba, inge akye kimwesho kyafumapo pe amiwa, amba Amiwa nkepaiwa mu kyavuma nangwa nangwa kintu kimo.” Nalangulukile mba, “Amiwa Bano. Nashikulwa Peulu. Amiwa...abo, baji muno kuntu kumo, Amiwa—Amiwa nji mu kikye, aye pilamenda ya Bamalaika papo. Bino, Ami—Ami kechi nayuka ne. Kapapo aye Nkambo ubena kwiya na kusenda kutwala ku Muzhi.”

Nanchi Naumvwine Yosefwa kokwa, na kwamba mba, “Taata?”

Nalangulukile mba, “Ine, inge byokiji, inge kyamusenda, ne aye.”

45 Nanchi Kintu kimo kyaambile mba, “Obewa...” Vulukai, Amiwa mbena kupembelela, na kupembelela Mbila yo Napembelela kulutwe, kintu kimo.

46 Kabiji kimwesho, juba jikwabo, mwayukatu, nobe byonka byo Najinga kuno kechi papita kimye kyabaya ne, na nkumbuula kintu kikamweka, byo Nasapwijilenga, kufuma ku juba, kwiya mu kikye kifulo. Kabiji—kabiji pano Aye waambile mba, “Pano vulukai, mwingilo wa bubiji ukyangye kwiya.”

Nalangulukile mba, “Kukekala Mbila.”

47 Vulukai Mbila yami kuno? Kunshikula kwa jibwe ja jikoka, kwepi, aa mawi sebeni ne tutetesho ato twabula ne kunembwa mu kyambo kya Lesa. Vulukai? Kabiji kyatwajile mu pilamenda.

48 Kabiji Junie Jackson, inge uji muno, akya kiloto kyo wambujile mba kechi papita kimye kyabaya ne. Amiwa kechi nsakwikibulang’ana lukeelo luno ne. Obewa mwajinga bingi... Lesa wajingatu bulongo. Kabiji ndekelaiko mambo pa kubula kupana kilumbululo ne; mambo, Namwene kintu kimo kasa kibena kwenda.

J. T., kintutu kimo, mwamona. Kabiji Na—Na—Nayukile kyokyo.

Kabiji Nyenga Collins, kijitu pamo. Mwamona?

Kabiji sikisi ya bibye, bibena kutala ku kintutu kimo.

49 Kabiji pano kimwesho kyo Nemubuuji anweba bonse, myaka yapita kunyuma, kyamwekeletu joja juba jikwabo. Mwamona? Akye kikamweka.

50 Kabiji abyo byokiji, bijitu bulongo, byonse byalalatu patonka. Ke kintu kimo kibena kwenda. Amiwa kechi nayuka byokiji ne. Lesa nkwashai; yo milombelo yami.

Twayai tulombe.

51 Taata wa Mwiulu, atweba twi—atweba twi bantu bafwa, kabiji twaimana pano lukeelo luno. Kabiji, Nkambo, Na...

Anweba mwatumine kutangijila jije jitanga jicheche kabiji ne kino kipwilo. Kabiji Amiwa nji kumpelo yami. Amiwa kechi nayuka ne kana jepi jishinda, kika, kwepi, ko kibena kwiishila. Bino Nayuka kikye kintu kimo, amba, Anweba mwaambile mba Mukalenga “bintu byonse kwingijila pamo kubuwame bwa booba” bemutemwa Anweba kabiji baitwa monka mwaila kufukula Kwenu. Amiwa ne mulomba Anweba, Lesa, amba kuboko Kwenu kukatampe kwa lusa kwikale pe atweba.

<sup>52</sup> Atweba kine twayuka mba Anweba mwi Lesa. Kabiji twayuka mba Anweba kechi mwi umo waikale mu moba apita kunyuma ne, bino Anweba muji na bumi ne leelo. Anweba kimye kyonse mwajinga Lesa. Anweba kimye kyonse mukekala Lesa. Anweba wajinga Lesa kasa kukyangye kwikala kimye ne, kabiji Anweba mukekala Lesa byo kukabula kwikala kimye. Anweba mukekالاتu Lesa.

<sup>53</sup> Kabiji tuji mu maboko Enu, Nkambo. Atweba twi buchimba, kabiji Anweba yenu Mulenga, mwi Mbumbi. Lengai bumi bwetu, Nkambo, mujishinda jakuuba mba twikale bakwingila mwingilo wawama wakupana mushingi kwi Anweba. Kiswishai kye, Taata. Tujitu mu maboko Enu.

<sup>54</sup> Atweba kechi twajinga na jishinda ja kwiletelamo atweba bene muno ne, inge ne atweba kechi twayuka mwakufuminamo muno ne. Aye Nkambo, Mwapana bumi kwi atweba, kabiji Anweba muji. . . Twipana kubwezha bumi bwetu kwi Anweba, kabiji, mukyokyo, Anweba mwitupa, mu kupipuzhanya, Bumi Bwapeenape. Lwitabilo lwetu lupemena monka mu bumuntu bwetu. Kabiji twi mutemwa Anweba na mambo a kikye, mambo twayuka mba juba jimo tukemumona Anweba, kabiji Anweba mukekala mu lukumo Lwenu. Kabiji tubena kutala kwi Aye. Kabiji tubena kukabila kumvwa byo byo byambo, “Waingijile bulongo, kalume Wami wakishika ne wawama. Twelai mulusekelo lwa Nkambo, alo lwanengezhiwe anweba kufuma ku kitendekesho kya inontanda.” Poso kufika pa kyokya kimye, Anweba Lesa, kimye atweba bonse po tukakumana, tutangijilai.

Atweba twi bakalume Benu, kabiji twalomba kulekelwa kwa mambo etu.

<sup>55</sup> Abye bimwesho bya bulume, Nkambo, byakila kubaisha ku kalume Wenu. Amiwa kechi nayuka byakuuba ne. Amiwa—Amiwa nayukatu mba byaishile. Kabiji Nakonshatu kwamba byo Namona, kabiji ne byobya byaambiwe. Kabiji kimye kimo kindetela moyo, Nkambo. Kabiji Na—Nakumya kana kika kyakuuba.

<sup>56</sup> Pano Ntola Baibolo ne kutanga momwa Isaya byo afwaijilwe kwikyumvwa joja juba mu tepo, byo amwene aba Bamalaika, byapi byamvweta mauu Abo. Kechi kyakukumya aye kyo ajijile, “Malwa ami! mambo meso ami amona lukumo lwa Nkambo.”

<sup>57</sup> Kabiji ponkapa ipo ngauzhi po ajijile: panyuma yakutokeshiwa mu tepo, kimye Malaika kyo atolele kimano ne kutola jikala ja Mujilo ne kwijibika pa mivumbo yanji; panyuma ya kwisolola amba aye wajinga muntu wa byatunwa byabula kutokeshiwa, kabiji waikala, mukachi ka bantu babubipisho. Nangwa byonkabyo, aye wajinga ngauzhi. Aye Malaika watolele kimano ne kubika jikala ja Mujilo pa mivumbo yanji ne kumutokesha, kabiji waambile mba, “Pano yanga, ukaule.”

Nkambo Lesa, Isaya wajijile, “Amiwa Bano, Nkambo. Tumai miwa.”

<sup>58</sup> Kimye, Aye kyo aambile mba, “Ing’anyi usakwitwendelako?” Mambo akyokya kisemi kyabubi ne kya bukende!

<sup>59</sup> Anweba Lesa, lekai kibwezhiwepo jibiji. Lekai kiye ne jikwabo, Anweba Nkambo. Tumai Mupashi Wazhila na Mujilo utokesha. Mambo, Nesolola, Amiwa ne muntu wa mivumbo yabubipisho, kabiji ne kwikala pano pantanda na bantu babubipisho. Kabiji atweba twibabubipisho ku meso Enu, Nkambo. Bino, oo, tumai bulume bwakutokesha, Mupashi Wazhila! Tutokeshai, Anweba Nkambo. Tokeshai kalume Wenu, Nkambo.

<sup>60</sup> Kabiji pano ambai, Nkambo. Kalume wenu ubena kuteleka. Amiwa mbena kukabila kumvwa aja Jiwi. Amiwa ne Wenu. Ng’ingijishai, Nkambo, monka Momwikimwena kuwama, kasa Nebika amiwa mwine pa kitapisho Kyenu. Lekai Mupashi Wazhila angomvwe, Nkambo; kabiji mushingai manyi ne kumutuma, Nkambo, inge Anweba mubena kukeba muntu umo kuya, inge uno ye awala kabiji akino kyo kimye.

<sup>61</sup> Amiwa—Amiwa kechi nayuka ne, Nkambo. Amiwa—Amiwa nayukatu mba Namwene aba Bamalaika. Kabiji Anweba mwibiyuka abye bintu amba bya Bukine. Kabiji Nalomba, Nkambo, “Malwa ami,” nanchi nkwashai.

<sup>62</sup> Kabiji pano peshai babo bantu. Kabiji tuji pano leelo, juba jakusekelela kwa kusemwa kwa Nkambo yetu kasa jikyangye kufika ne. Twalomba mba Anweba musakwitukwasha.

<sup>63</sup> Kabiji lukeelo luno, kalume Wenu, Mulongo Neville, kyo aumvwa mba ke kimye kyo akonsha kukokolokako mu bimye bicheche, kabiji kape Amiwa nakonsha kwamba. Kabiji Na—Nalomba mba Anweba musakukwasha.

<sup>64</sup> Muji booba muno, Nkambo, kabiji ne atweba bonse, twimukabila Anweba. Nanchi twalomba pano amba Anweba musakwitupesha byo tubena kutanga Kyambo Kyenu ne kulanguluka langulukapo pa kakimye kacheche. Lekai Mupashi Wenu eye pe atweba, Nkambo. Kabiji tutokeshai ne kwitubika pa Mujilo, na Mupashi Wazhila, na Mbila ya kwa Lesa, ibishi yafuma ku kitapisho, mu kusukanya ntanda ibena kufwa, kasa akyangye kufika awa Lesa mukatampe Wapeenape. Mambo

twikipuzha mu Jizhina ja Yesu, Mwaana Wanji mutemwe, kabiji ne Mupulushi wetu. Amena.

<sup>65</sup> Pano Nasaka kwita milanguluko yenu ku Kinembelo kimo papo, kabiji ne byanembwa bicheche, byo Nanemba papo.

<sup>66</sup> Kabiji Naketekela, Doko, nangwa Billy, nangwa umo wa mwiabo wambujile, mba tulupukeko bukiji, namambotu a baana babacheche. Baji na byabupe byabo.

<sup>67</sup> Anweba balunda babacheche mwafumatu mu sukuulu wenu wa Pamulungu, anweba—anweba ngikalaitu, pa kimye kicheche. Byo tubena kwamba muno byakonsha kwikala byazhika kwi anweba, bino anweba—bino anweba mwikaletu ne bamaama ne bataata, pa mamineti acheche. Nasaka kwamba kwi abo.

<sup>68</sup> Pano, amwa mu Masalamo, Salamo wabu 89, Nasaka kutanga veeleshi nangwa abiji, a mu Salamo wabu 89. Amiwa sakweseka kutanga wabu 50, wabu 51, kabiji ne abu 52 maveeleshi a Masalamo 89.

<sup>69</sup> Pano, mwakonsha kung'umvwa kunyuma kwine, kijitu bulongo? Inge mwakonsha, sutulaiko maboko enu. Nanchi Ami. . . Akyo kyo. . . Bushe byonse bye byakwambilamo byumi nyi? [Mulongo waamba mba, "Amiwa kechi nayuka ne."—Waku.] Bushe *kikye* kyawama, nangwa *kikye* kimo? *Akye* nyi? *Akye* nyi? ["Abye bibiji kululwe lubaji byumi."] Ponka pano, *abye* bibiji ku lubaji lumo? ["*Akye* kuno, *akye* kuno, kabiji ne *kikye* kuno."] Kijitu bulongo.

<sup>70</sup> Amiwa kechi nayuka ne kana babena kukopa bibye pa tepu nangwa ine. Kijitu pamo nobe kintu kyakubula kuketekela kubiwa lukeelo luno.

<sup>71</sup> Bino kechi mulubeko ne, ikalai na balunda nenu bonse. Kabiji Na—Nakeba mba anweba mwikale ba bukishika, pepi nobe, mukeseke kutanwako ku mbung'eno ya pa Mulungu ubena kwiya.

<sup>72</sup> Bukumotu bakapwishe kipwilo kuno, Naketekela. Kabiji Amiwa—Amiwa nkabwela pa kyokya kimye, na kusapwila pa atwa Tutetesho Tutanu na tubiji, inge kikekala kyokyaswa muchima wa Lesa, kufuma mu Kinembelo mumwe.

<sup>73</sup> Mu Buuku wa Masalamo, kyapitala kyabu 89, kutatwila pa veeleshi wabu 50. Telekai bulongo kutangilo ya Kyambo pano.

*Langulukai, Nkambo, kwendelekwa kwa bakalume benu; Byo naumvwa mu kyaji kyami myendeleko ya mitundu yonse ikatampe ya bantu;*

*Yo bang'endelekele balwanyi benu, Anweba YEHOBA; yo bang'endelekele monse mukwenda kwami.*

*Atotwe YEHOBA myaka ne myaka. Amena, ne Amena.*

<sup>74</sup> Nakonsha kutemwa kwamba kwi anweba bimye bicheche pa. . . Nasaka namba anweba mukwate kikye, patanshi, kabiji

kitangai jikwabo ne jikwabo, bulongotu. Kapepo kyafwainwa kutangwa jibiji ponka pano. Telekai bulongo. Mwamona?

*Langulukai, Nkambo, kwendelekwa kwa bakalume benu; byo naumvwa mu kyaji kyami myendeleko ya mitundu yonse ikatampe ya bantu;*

*Yo bang'endelekele balwanyi benu, Anweba YEHOBA; Yo bang'endelekele amiwa washingwa manyi monse mu kwenda kwami.*

*Atotwe YEHOBA myaka ne myaka. Amena, ne Amena.*

<sup>75</sup> Ne Kwikitanga pepi, byonka Davida byo aambile. Nasaka kwingijisha mutwe...Ke kintu kyenye, inge kibaba kya Kimishimishi ne jikwabo; nobe byonka byo Nasapwijile Mulungu wapwa pa kibaba kyenye. Nalubamo byo kyajinga. Kyajinga...[Mulungo umo waamba mba, “*Ntanda Ibeni Kupalang’enamo.*”—Waku.] Ndekelaiko mambo? [“*Ntanda Ibeni Kupalang’enamo.*”] Kupalang’enamo: *Ntanda Ibeni Kupalang’enamo.*

<sup>76</sup> Pano Nasaka kwingijisha nobe kibaba, uno Mulungu: *Kwendelekwa Namambo A Kyambo.* Pano lekai ne kyambe jibiji, bulongo. Aya...*Kwendelekwa Namambo A Kyambo.*

<sup>77</sup> Lesa uji na kimye, kabiji ne ene mambo a kyokya kimye, kya kufikizha Byambo Byanji byonse. Lesa wayuka byonka Aye byo akooba. Atweba kechi twayuka ne. Twafwainwatu kwi kitambula Monka mo ekipaina kwi atweba. Bino, Aye wayuka, kabiji kafwako nangwa kimo kyakonsha kulubakana nakyokya Aye—Aye kyo anengezha kuuba ne. Kyonsetu kyakonsha kufikizhiwa. Kwafwainwa kwikala, bime bimo, byakonsakana ne bintu byakonsa, pakuuba mba mufume bintu bitutulu, musango mwine wakine wa kyokyo kintu.

<sup>78</sup> Mwanyakatu, mvula usemekwa mu mapumba mapumba, byakonsakana, kubeshabesha kwabaya, kupatapata mwiulu. Kabiji inge kechi twajinga na mvula ne, atweba kechi twakonsha kwikala na bumi ne. Bino mwamona byo kyubiwa pakuleta mvula? Kupatapata, kubeshabesha, kumunyika, bukaji. Kabiji kufuma momwa mwaiya mvula.

<sup>79</sup> Lukunwa wafwainwa kufwa, wabola, kabuwatu, kunuka, ne kubwela jibiji ku lukungu wantanda, pakuuba mba mufume bumi bupya.

<sup>80</sup> Kisenda kutwa kwa golode, waalulwa alulwa javula, lutwe ne lunyuma, ne kutwa poso byonse byapeulu byafumako. Kechi mambo akuuba mba kibesha ne, mambo mimbulungwa ya kyela kya kapotwe, abyo bitelwa mba golode wakosama, ubeshatu nobe mwiine golode. Bino, umvwe mwabika abya bibiji pamo... mwibibika kulubaji lumo, kechi mwakonsha kwibyabanya ne, pakuuba kwibibika pamo, mwakonsha kubulang’ana. Kabiji

awa umpumapo utwajijilatu na kumpumapo poso aye—aye wimona kilungi kyanji mu golode.

<sup>81</sup> Kabiji Lesa wabika kimye kabiji uji na nkebelo ya bintu byonse byo Ooba. Kechi pajipo kintu kimo kyubiwatu kya mapuso kubooba batemwa Nkambo kabiji baitwa monka mwaita kwita Kwanji ne. Mwamona? Atweba twatongwelwa jimo. Kabiji bintu byonse bingilatu bulongo, mambo akyokyo, Aye kechi wakonsha kubepa ne. Kabiji Aye waambile mba biji byonkabyo, kintu kyonse kiji na kimye kyakyo, bimye byatongolwa, kabiji biji na jishinda jajo. Kabiji Lesa wikala panyuma ya kwenda kuji konse. Kabiji kimye kimo mulanguluka mba bintu byonse bibena kubiwa mobyatamina. Kijutu kwi atweba. Abya bintu byabikwa pe atweba, byalweseko ne bya kwendauka. Ke kwesekwa, pakuuba bamone byo usa kuuba pa kikye kyubilo.

<sup>82</sup> Kimye kimo kunyuma, akwa ku Vermont, Mulongo Fred ne Amiwa twaile kulubaji lwa New York, kukilang'anya Kizhiba kya Champlain, kabiji twafikile kulubaji lwa New York. Kabiji Naile mu mutumba konka, akwa ku Mutumba wa Hurricane, ko Nalozelanga nyama. Kabiji kokwa Navuluka kimye kyo Najinga waluba, kabiji ne Lesa byo atangijile kubwela, konka ku Mupashi Wazhila bunke, kupita mu mwela mukatampe. Akwa, Nafwaijilwe kufwa, konaika, pamotu ne mukazhi wami ne Billy, konkakwa pa kamwimba kakacheche kwalepa bingi ma mailoshi. Kabiji Naalulukile.

<sup>83</sup> Kabiji kokwa kwajingatu sino mucheche po twapichijile, pakuuba mba tufike pa kambi, mu kimye kyalutepu. Kabiji Naimene popa na kwamba kwi Mulongo Fred, kabiji ne Mupashi Wazhila waambile mba, “Yanga obewa mwine.” Kabiji Naendele kuya mukipupu kacheche, pa mpuzha icheche. Aye wambujile mba, “Kuji fimbo yo bakuteya. Wikale wajimuka pano.” Bino Aye kechi wambujile byokiji ne, nangwa kika. Nabwelele na kubuula Mulongo Fred.

<sup>84</sup> Twayile ku kipwilo abwa bufuku mu kishimikwa kya bisela, twikibijikile ku bantu. Kabiji bufuku bwalondejilepo kyamwekele. Kabiji byo Naimene popa kimye Aye kyo aambujile, kubooba bamyendeleko, Aye waambile mba, “Kiji mu maboko obe. Ingila nabo. Kyonse kyo wakonsha kwaamba, kisa kumweka ponka pano.”

<sup>85</sup> Abyo byobyoyo kiji. Kwepi, muntu umo wabula kito, wabula bulesa, kabiji abo baendelekelenga ne kuleta bisela pa yoya mpwijilo, mwanamulume wakyanyike ne mwanamukazhi wakyanyike. Kabiji wakebelenga kuuba bya-kwifwalama nanji monka mu kishimikwa; kabiji bonse batajileko, kimye kyo Nasapwijilenga. Kabiji wabwezhezhe muntwe wanji lunyuma ne kukajila pa kijoma kyanji na kukeba ku mufyopa, kabiji

wayilenga byonkabya mupwijilo, na kusenda milanguluko ya bantu.

<sup>86</sup> Kabiji Mupashi Wazhila waambile mba, “Pano uji . . . Baji mu maboko obe. Wakonsha kuba byepi nabo?”

<sup>87</sup> Kwajinga kuzhindama kwazhila. Muntu yense wazhindaminetu zoo. Kabiji Nalangulukile mba, “Anweba Lesa, kika kyo Nakonsha kuuba?”

<sup>88</sup> Nanchi Navuluka, inge kechi kyajinga lujimuno lwa Mupashi Wazhila ne, moba abiji kasa kikyangye kubiwa. Naambile mba, “Amiwa nsakukulekela mambo.” Bino, akyo kyajinga Aye kyo akebelenga amiwa mba ng’ambe. Mwamona?

<sup>89</sup> Mambo, nangwa byonkabyo, Na—Najinga wazhatwa, kape kechi na kyokyo ne, bino ke kuzhatwa. “Kabiji wazhatwa mu bicheche ye wa mu byonse.”

<sup>90</sup> Nanchi Naambile mba, “Nakulekela mambo.” Kabiji kuji bakamonyi baikala monka muno, bajinga konka pakyokya kimye. Ponkapo Mupashi Wazhila waponene.

<sup>91</sup> Pano, mwamona, Naketekela mba byonse bye bintu byajinga na kilumbululo. Wakonsha kuuba byepi na bulume? Wakonsha kuuba byepi obewa, byubilo byobe ku kintu kyaubiwa? Kintu kimo kyaiya nobe kyubilo, pano wakonsha kuuba byepi ku kyokyo kyubilo? Bushe mwaumvwa Amiwa mo ne kitazha nyi? Mwakonsha kuuba byepi? Kabiji kape byonse bye byaingila kufika pano potuji. Amiwa kechi nayuka ne. Ami—Ami kechi nakonsha kwikyamba ne. Bino kimye kyonse kwikala jishinda . . .

<sup>92</sup> Kabiji vulukai mba, myendeleko ya—ya Kyambo iji na . . . Akyo Kyambo kimye kyonse kikala na myendeleko. Kupita mu mankulo onse, Kyambo kyakwa Lesa kyashingwa manyi kimye kyonse kyendelekwa. Kabiji ao oene mambo kyaikela kyakonsa ku bantu babula kukwatakanya, pakuuba mba bayuke mwakuswila aya myendeleko.

<sup>93</sup> Mwakonsha kuvuluka baana babwanga byo babwelelenga kabiji basangalele mambo bayukile mba bajinga babalwa kutambulwila myendeleko ya Jizhina Janji? Aye waambile mba, “Bonse bekala bwikalo bwaoloka mwi Kilishitu bakamanyikwa,” myendeleko ya Kyambo.

<sup>94</sup> Obewa kimye kyonse wafwainwa kwimana na iye myendeleko pakuuba mba upite mu lweseko, pakuuba mba umone. Muntu yense wiya kwi Kilishitu wafwainwa kwikala mwaana-wafunjishiwa, na—na mambo a kintu Lesa kyo akubikijileko. Kabiji vulukai, inge mwakonsha kuzhindamatu nzoo! Vulukai, inge Aye wakwichile na mambo a kikyeye, kechi pajipo kintu kyakonsha kukanya kubula kumweka ne. Kechi kujipo bademona bavula ba kumanyika ne, bino Kyambo kya Lesa kikasololwa. Obewa wasemekelwa mambo a kintu kimo,

kabiji kafwako nangwa muntu umo wakonsha kutola kifulo kyobe ne. Wakonsha kwikala na bakusombolola ne bintu byonse, bino kechi bakonsha kutola kifulo kyobe ne. Ibyo. Kyambo kya Lesa kikashinda. Kechi kikakalwa ne. Apo ipo Mwinakilishitu yense po afwainwa kwimana, kasa wayuka kyokyo—kyokyo. Kabiji meseko akeya, ne kumweka mujishinda jiji jonse, kwi obewa. Bino vulukai, Lesa uji na nkebelo, kabiji kikengilatulu bulongo.

<sup>95</sup> Pano twayai tuvulukepo kunyuma—bintu bimo bicheche bya mu Kyambo kya Lesa byafikizhiwe, kabiji ne booba basendele Kyambo mu nkulo yabo.

<sup>96</sup> Na—Najikumvwa mu Mupashi, kechi papita kimye kyabaya ne, amba muntu umo ubena kujimbulula. Kape kyafwainwa kwikala kubooba baji mu ntanda ya tepu. Kimye kyonse kibena kutongwela pabaya, amba yanga usende bantu ba mu Baibolo pa byo Mbena kwamba. Kyawama, Amiwa nguba kyokyo na mambo a kintu kimo. Aye Baibolo waamba mba abye bintu byanembwa pakuuba mba tutalepo. Kabiji ajo jo jonka jishinda, kwakubula kufunda ne, jo jonka jishinda jo Nakonsha kuuba, ke kubwela panyuma ne kwamba mba, “Anweba mwamona *kikye* po kyaimena, kika kyamwekele na kiky, kwepi kwamwekele *kikye*.” Mwamona? Kabiji pano obewa mwine wibikemotu momwa.

<sup>97</sup> Nobe byo Nasapwijilenga, kechi papita kimye kyabaya ne, pa yewa nsongwalume mucheche wajinga mu bwato, mwayukatu, kabiji—kabiji awa kapiteni wakala wafwilenga. Aye wajinga wakolwa. Kabiji waiwizhe kana kechi kujipo Baibolo mukachi ne. Kabiji ba kwachile awa nsongwalume wajinga na Baibolo, kabiji waishile ne kutanga Isaya 53:5. “Aye waashilwe na mambo amizhilulwila yetu, wafumpilwe na mambo abubi bwetu.” Kabiji aye waambile mba, “Lekai . . . Lekai ne mubuule, kapiteni, bamaama byo bamutanganga.” Waambile mba, “Ajino jo jishinda mo anembelwa: ‘Aye waashilwe na mambo abubi bwakwa Willy Pruitt. Kabiji Aye wafumpilwe na mambo akwa Willy Pruitt. Kabiji ne byose bye bintu byo Aubile, byajinga bakwa Willy Pruitt.’” Aja jajinga jizhina janji.

Aye kapiteni wakala waambile mba, “Natemwa kyokyo. Wakonsha kutanga jizhina jami mu kyokyo?”

<sup>98</sup> Aye waambile mba, “Amiwa nsakweseka.” Kabiji waambile mba, “Aye waashilwe na mambo amizhilulwila yakwa Yoano Quartz. Aye wafumpilwe na mambo a bubi bwakwa Yoano Quartz. Kabiji ku mikakamba Yanji Yoano Quartz wabukilwe.”

Aye waambile mba, “Amiwa ne kimona.” Kabiji aye Nkambo wa mubukile. Mwamona?

<sup>99</sup> Tangai jizhina jenu mu kyokyo. Aye waashilwe na mambo a mizhilulwila yakwa William Branham. Aye wafumpilwe na mambo a bubi bwakwa William Branham. Aye waubile kyokyo



kwi amiwa, kabiji Aye waubile kyokyo kwi anweba. Tangai jizhina jenu mu kikye.

<sup>100</sup> Kyawama, ajo jo jishinda jo Natemwa kuletelamo Binembelo ku—ku bantu bami, ke kyokya Aye kyo aubijile muntu umo wamukokejile Aye. Akya kyo Aubile ku muntu mukwabo kyajinga kyakishika mwaila ene Mambo, kabiji ne byo Aubile ku muntu mukwabo ao wabujilwe kwikala bukishika ku ene Mambo, nanchi witanga jizhina jobe mukyokyo. Inge obewa wajingako kokwa, ng’anyi lubaji lo wafwaijilwe kutolako? Kabiji vulukai, uji na jishuko, leelo, ja kutola lubaji lo wayimenamo.

<sup>101</sup> Kimye, Nowa, pa myendeleko ya Kyambo akyo Lesa kyo aambile kwi aye. Nowa, akwa wajinga myendeleko. Nowa waikela mu nkulo ya saayasi, akwa kwajinga byakumwenamo bya kisaayasi byo balengelenga, abyo byakijile pa byo babena kulenga buleelo. Bajinga ba maana, bajimuka bingi. Saayasi wabo wajinga waya palepa bingi, kwesakanya pamo ne atweba. Kabiji vulukai, wafwaijilwe kwimana ku myendeleko ya Kyambo kyo asapwijile, pa myaka aduleendi na tweti, mu kilungi kya bakajimbulushi. Mashinda abo akatampe a kisaayasi ashiniikishe mba kechi mwajingapo mvula mwiulu ne. Bino, nangwa byonkabyo, Nowa waumvwine Kyambo kya Nkambo, kabiji Kyajinga kyapusanakotu na milanguluko yabo Yakikye. Nanchi, bumi bwanji kasa bukyangye kupuluka, wafwaijilwe kwimana mu kilungi kyabo ne kusenda myendeleko ayo bakajimbulushi yo bamwendelekelenga.

<sup>102</sup> Oo, kechi kujipo luzhinauko ne, bafwaijilwe kumumvwina lusa awa musapwishi mukote. Abo kechi bamufumisheko nangwa kintutu kikwabo ne, mambo kape kechi kwajinga manzubo avula a yewa musango mu joja juba ne. Aye kechi wajinga na lukatazho ne. Aye kechi wakozhezhepo muntu nangwa umo ne, nanchi bamulekeletu buke bwaji. “Yangatu kulutwe, awa mukote wabisela akwa kulubaji lwa konka katumba, na kushimika bwato kasa kwabula meema. Oo, kyawama, mulongo mukote kamulanda! Bino,” baambilenga mba, “meema ukeafumya kwepi, akwendesha bwato bobee, Nowa?”

“Abena kufuma mwiulu.”

<sup>103</sup> “Kechi muji maana ne. Twakonsha kuloza ng’ondo ne tubaangabanga, na katajilo,” byonse byo bajinga nabyo. “Kechi kuji mvula kokwa ne.”

Bino aye waambile mba, “Lesa waambile mba Ukabikamo amo momwa.”

“Pano Aye wakonsha kwikyuba byepi?”

<sup>104</sup> “Ao ke mwingilo Wanji. Kintutu kyo Nafwainwa kuuba ke kupana lujimuno kwi anweba amba mufume kuno.”

<sup>105</sup> Kijitu pamo nobe pakino kimye. “Mujilo ubena kufumapi?” Mulongo, kyapeelako pacheche mu buleelo kukila byo kyajinga mu kimye kyakwa Nowa. Twamona kala pokiji. Kyanengezhiwatu kufika, kyo kyonka. Sayaasi wauba kala. . . Kechi kujipo mwakunyemena pa kino kimye ne, nangwa pacheche ne, mambo sayaasi wikimona kala. Ee, mwane.

<sup>106</sup> Nanchi pano twatana kuuba mba kyajinga kintu kyakatazha bingi. Nanchi baumvwijile lusa awa musapwishi kamulanda mukote, kabiji bamulekeletu nakuya. Kyajinga kintu kyenye, kapepo, kwi abo bantu, kulanguluka mba muntu wafwainwa kwikala wamaana, kabiji wakonsha kuketekela yewa Lesa, Mulenga wa meulu ne ntanda, wakonsha kubapo kintu kimo, nangwa kwambapo kintu kimo kyo Afwainwa kuuba, akyo kyajinga kyapusanako na milanguluko yabo, na byo bajinga nabyo. Kapepo anweba kechi mwikikwatakenye ne. Talai. Kyajinga. . . Balangulukilenga mba bakonsha kushiniikisha kyonse kilengwa na lesa na sayaasi wabo. Inge ayo kechi ye musango wa ntanda yo tubena kwikalamo leelo ne, ya kufunda, ntanda ya kufunda mwayula sayaasi! Kabiji kyonse kyo bakonsha kushiniikisha, akya kyajinga kilubo, kya Lesa. . . “Kafwako Lesa wakonsha kwamba kintu kiji kyonse (kyajingako) akyo kyo bakonsha kushiniikisha na busendwe bwa sayaasi amba kechi kyajingako ne.”

<sup>107</sup> Bino, baji na mulanguluko umo leelo. Inge dokotala obe waamba mba uji na kaasa, wafwainwa kufwa, kabiji ne sayaasi washiniikisha amba uji na kaasa, kabiji amba wakomeenena, kikala kyakubula maana kulangulukila mwapusako, mambo ukafwa; kyokyoka. Sayaasi waamba mba usa kufwa. Abo ba kupima, kabiji akyo kyokyonka. Obewa usakufwa. Kabiji abo balanguluka mba ke bukonye inge waeseka kwamba mba Lesa walaile kwikyuba. Monai, byonka byo kyajinga, wafwainwa kwimana ku myendeleko.

<sup>108</sup> Baamba mba, inge dokotala waamba kuno amba, “Twatajilemo, kabiji awe kaasa waendelela bingi. Twakushinkula obewa. Wapita monse mu mubiji obe, kabiji wapita ne ku muchima obe, wapita ku mapwapwa obe, wapita ku jichima jobe, ne ponse ponse. Kechi kyakonsheka ne.”

Nanchi, mwamona, inge waamba mba, “Bino ukekala na bumi, nangwa byonkabyo.”

Baamba mba, “Kyawama, mulunda kamulanda, mulekaitu bunke.”

<sup>109</sup> Navuluka bufuku. Bill Hall, Mulongo Hall kokwa ku kipwilo kya Milltown, anweba bavula mwavulukamo aa mambo. Kabiji aye byo. . . Bangichile. Bakazhi bami, bako-bami-babakazhi ne Amiwa, twayileko. Aye wasongwele nsongwakazhi wajinga nyenga, Naketekela, kwi George Cupp, wajinga mukulumpe wa muzhi, nangwa chibishi wamambo kuno. Wanji. . . Awa wajinga

bukwe-waji-wamulume. Bamuletele kuno amba akafwileko. Ba dokotala mu Milltown, dokotala mu New Albany, bapimine lukatazho lwanji amba kaasa wa ku jichima. Nanchi Naile na kumona Mrs. Hall. Kabiji aye watomene muchi, kabiji wajinga wa kibobo ponse ponse. Kabiji Naambile mba, “Kyawama, Naketekela mba usakufwa.” Kabiji Naambile mba . . .

<sup>110</sup> Aye waambile mba, “Mulongo Bill, pajipo jishinda jiji jonse jo. . . Wakonsha kumvwa kufuma kwi Lesa nyi?”

Naambile mba, “Ami—Ami kechi nayuka ne, Nyenga Hall. Nakonsha kulomba.”

<sup>111</sup> Nalombele. Kabiji Nabwelele ku nzubo, kabiji Nkambo kechi waambilepo nangwa kimo kwi amiwa ne. Nanchi Nabweleleko, juba jalondejilepo, kabiji Nalombele jibiji.

Kabiji waambile mba, “Bushe wayukapo dokotala wawama nyi?”

<sup>112</sup> Naambile mba, “Kyawama, dokotala wetu wa kisemi Dr. Sam Adair, monka muno mu Jeffersonville. Aye ye—aye ye—aye ye. . . Bashanji bajinga badokotala ba kisemi kyetu. Mwanyike Sam ne Amiwa kimye kyonse twaikala pamo balunda bawama bingi, kabiji—kabiji twayile ku sukuulu pepi nobe pa kimyetu kimo, twakomena pamo. Atweba kimye kyonse tuya kwi aye umvwe pajipo kintu kimo kiyatama.”

Waambile mba, “Nakumya kana wakonsha kwiya na kumumona Bill Wall?” mulume wanji.

Naambile mba, “Amiwa nsakumwimpuzha.”

<sup>113</sup> Kyawama, Sam waambile kwi amiwa, waambile mba, “Billy, inge dokotala waamba mba uji na kaasa,” waambile mba, “kujitu kintu kimo, kyakuuba amiwa, Amiwa nkamutuma ku muntu mukwabo wajimuka kukila Amiwa, ku sendwe. Kabiji tusa kusenda x-ray; kabiji kechi tukamubika mu lukatazho luji lonse ne.”

<sup>114</sup> Twatumine ku New Albany kabiji twatambwile x-ray kufuma kwi dokotala konka kwa. Twamutwajile ku Louisville na kumupima, ba mutwajile mu ambulasi, ne ku mubwezha.

<sup>115</sup> Kyawama, nangwa byonkabyo, aye kechi waambile ku ba Mrs. Hall lukatazho lwanji ne, nanchi wangichile amiwa. Aye waambile mba, “Aye ubena kufwa,” waambile mba, “mulunda obe musapwishi.” Waambile mba, “Sendwe wa ku Louisville wafumatu na kungita, kabiji waambile mba, ‘Kupima kwapaine badokotala ku—ku. . .akwa ku Milltown; ne dokotala ku, New Albany; bapainetu sawakya wawama wapimino.’” Kabiji waambile mba, “Ke kaasa wa ku jichima, kabiji wafika palepa. Kabiji, Billy, kechi twakonsha kuchibako jichima ja muntu ne, kabiji waikala na bumi ne.” Waambile mba, “Aye ubena kufwa. Kabiji umvwe aye ye musapwishi, wafwainwa kwikala winengezha.”

116 Naambile mba, “Ajo kechi jo jipuzho ne. Bino aye kechi wakila pa myaka fifite-faivi ne, nanchi aye ukijitu na bumi bwavula bingi mwi aye nangwa byonkabyo, bwa kusapwila.” Kabiji Naambile mba, “Kyawama, inge wakonsha kufwa, akyo kypwisha byonse. Nemusachila, Dr. Sam.”

117 Kabiji Naile na kwita ba Mrs. Hall, kabiji ne Babuujiile. Naambile mba, “Mrs. Hall, Sam waambile mba pimino ya ku Louisville yajingatu pamo byonka byajinga ya ku New Albany ne Milltown. Awa muntu ubena kufwa. Mulongo Hall usakufwa. Kabiji uji na kaasa ku jichima, kabiji kaendelela bingi.”

118 Kabiji nanchi watatwile kujila. Naalulukile, ne kulomba naji. Kabiji wajinga walubakanako, nanchi, bino kechi wayukile mba Najinga mu kibamba ne.

119 Nanchi, Nabwelele. Kabiji bantu bavula baishile pa nzubo, mu oa moba. Kechi kwajingapo nangwa muntu umo mu mwingilo ne. Kechi pakatazhiwe kyabaya ne, kabiji bantu bayishilenga kufuma konse konse.

120 Nakebelenga kukokoloka pacheche. Nanchi Natwelelemo, nabukile kumanyashi, pepi nobe tuu-sate, nangwa fiili koloko. Mulongo Wood kechi wakitwelamo mu mukwakwa ne. Kabiji Natajile mu mukwakwa, kabiji kechi kwajingapo kimo ne, kafwako nangwa umo wajingako ne, nanchi Natolele kisochi kyami kyakala ne kutwela mulumu wakukokolokelamo, kabiji natolele .22 laifo wami. Kabiji Nailenga na kwipaya baluyeye, poso kyafika pa kimye kya eiti koloko, kabiji pano nalajile munshi ya kichi kuntu kumo nalala mutulo pacheche. Kuuba mwafika ne ku nzubo ne.

121 Natolele kisochi kyami ne kutatula kupita mu kibamba. Kyakobamine palubumbulu kyajinga ke jipeo. Kabiji jajinga ja—jayulwamo na biko. Jajinga jo baja-ku mizambo, jajinga na bizhokoto, kabiji jajinga na bilonda ponsetu. Kabiji Nalangulukile mba, “Kika Meda kyo akobekele kyokya pa kibumba?”

122 Kabiji Namwene, ne jikwabo, kabiji kechi kyajinga pa kibumba ne. Kyakobamine peulu mu lubesha. Navujile kisochi kyami kyakala, nabikile buta bwa laifo mu koono, ne kufukama pa manungo ami. Naambile mba, “Nkambo, kika Anweba kyo mwakeba kalume Wenu amba ayuke?”

123 Kwaishile mukwabo, kwaishile mukwabo, poso pepi foolo nangwa ma epozu faivi (Nalubamo byo ajinga) akobamine popa. Kabiji ke jabaya jikatampe, jalezhima jiji na mingalalangwa; ke jabaya bingi, ji epo jamweka-bututulu, jaikijile na kuchibako aa onse akwabo abena kumweka-bikozhabikozha. Kabiji Aye waambile mba, “Imana. Imana ku mauulu obe.” Waambile mba, “Yanga, ukabuule Bill Hall, amba kechi usakufwa ne. Aye ukekala na bumi.”

124 Oo, Nanyemene bukijitu monka mo Nakonshesha, kabiji Naambile mba, “Mrs. Hall, Njina ABYO BYOBYAAMBA AYE NKAMBO. Aye ukekala na bumi.” kabiji ne aye wang’umvwine. Kabiji wakebelenga kujila, kechi wakonsha kwamba ne jikwbo ne.

125 Nabwela konka ne kwita Sam. Kabiji Naambile mba, “Sam, wetu—wetu mulongo usakwikala na bumi.”

Aye waambile mba, “Wakonsha kwikala byepi muyewa musango?”

126 Naambile mba, “Akyo kechi kyo kyami kyakulanguluka ne. Lesa ye wikyambile. Akyo kyaikajika byonse.”

127 Aye uji na bumi ne leelo. Apo papita myaka pepi nobe teeni. Wakonsa kabiji wa bumi bwawama. Bakazhi banji bafwile kufumatu popa. Aye wasongola jibiji.

128 Kyakonsha kumweka byepi kwi George Wright, kabiji ne bavula bakonsha kwamba mba, mba twakonsha kwita? Kyo kika? Ke kwimana ku myendeleko. Baseka kabiji ne kusekesha.

129 Navuluka kimye muyulo kasa akyangye kwikalako wa mu 37. Naimene kokwa na Kipamo kya Falls City Transfer, kabiji nebabuuji lenga pa bya, kukekala meema ayula kufika pa sate-tuu fiiti, Naketekela byo kyajinga, mu Mukwakwa wa Spring. Abo basekelenga. Baambile mba, “Kamulanda Billy. Naketekela aye. . . Awa mwanyike!” Najingatu mwanyike pa kyokya kimye. Aye waambile mba, “Billy ke mwanyike wawama. Ke kintu kyabuvu aye wavundakanako.” Amiwa kechi navundankeneko ne. Amiwa nabatizhiwe *mu*, kechi wavundakana ne. Amiwa popo “nafikiletu.” Kabiji kyamwekejiletu monkamo.

130 Kufuma po Natapila kwamba, Najikumona Nyenga Hattie Wright, Naketekela, waikala kunyuma koko. Aye ubena kuvuluka aa mambo akwa Bill Hall. Bavula. Baanga baji muno, bajimo lukeelo luno, bakonsha kuvuluka aa mambo? Oo, ami! Kine. Muji bavula ba mwianweba.

131 Bino, betumvwina lusa, bomvwina lusa uji yense ukwachijila ku Kyambo, mu mooba abakajimbuluzhi. Bino, vulukai, myendeleko yafwainwa kwiya. Kimye kyonse kikala muyekao musango. Abo bafwajilwe kulanguluka, byonka byo baubile pa kyokya kimye, amba Lesa, panyuma yakushiniikisha byonse na sayaasi, amba Lesa kechi wakonsha kwambapo kintu kiji kyonse kypusanako na sayaasi ne. Kyawama, akyo kyo kyamulengejile Aye kwikala Lesa. Inge Aye wailengatu moka mwayila sayaasi, nanchi inge kyaikalatu kyakonsha kuuba muntu. Bino, Aye ye Lesa. Aye ye—Aye ye Mulenga wa sayaasi. Aye wakonsha kuuba kyonse kyo Akeba kuuba.

132 Abo bafwajilwe kulanguluka mba, “Kamulanda Nowa wakala, kyawama, mulekaitu awa mulunda mukote bunke bwaji. Aye wabula byonse byamakayo byo tuji nabyo mu

ano moba, nanchi mulekaitu bunke bwaji.” Kijitu pamo nobe pakino kimye.

<sup>133</sup> Bino, pano, Nasaka kwamba kintu kikwabo papo. Pano, tutala kunyuma ne kukomoka lwitabilo lwanji. Bino Nakumya, inge twaikelenga mujoja juba, bushe inge twaimene kulubaji lwa kwa Nowa nyi? Bushe inge twaikele kulubaji lwa myendeleo lwajinga na Bukine? Kimye, pa bonse mamilyoni bajinga muntanda pakyokya kimye, kwajingatu umo Nowa ne kisemi kyanji baimejile pa Bukine. Bushe mulangulukapo pa kikye nyi? Awa yeka mwanamulume ne baana banji basatu babalume, kabiji ne bako-banji-babakazhi, mukazhi wanji, ye yenka waimejile pa Bukine. Bino bajinga na ABYO BYOBYAAMBWA AYE NKAMBO. Tutala kunyuma ne kumukomoka. Bushe twakonsha kwikilanguluka jibiji?

Nafwainwa kupelawizhako mambo kuji kupana bya bupe ku baana.

<sup>134</sup> Abulahama, kyonka kyambo kya *Abulahama* kyalumbulula mba “shanja bavula,” walengelwe kwikala “shanja mikoka ya bantu.”

<sup>135</sup> Bino, Abulahama waumvwine Kyambo kya Lesa. Abulahama wajinga ngauzhi, kabiji waumvwine Kyambo kya Lesa. Kabiji atweba twakomoka Abulahama mambo akukwachijila kwanji kwa Kyambo kya Lesa; byo eabenye aye mwine kufuma ku kisemi kyanji; kyajinga kyakosa kwi Abulahama. Aye wakomejiile konkakwa. Wafumine ku Babela, kabiji—kabiji wajinga mu yoya ntada ya Shinala kabiji ya—ya—ya bena Kalondeya, mu muzhi wa Ula, ako bonse balunda banji, bantu banji, kabiji ne booba boayanga nabo ku kipwilo, ne bintu byonse. Bino Lesa waambile mba, “Ipatuleko obewa mwine.” Oo, ami! Kyajinga kintu kyakatazha bingi, kunsha bonse bo atemenwe bingi, kyonse kyajinga kintutulu kwi aye, kyo atemenwe bingi. Kabiji Lesa wamubujile mba, “Ipatuleko obewa mwine.”

<sup>136</sup> Kabiji wamupele kintu kyapusanako. “Obewa ukekala na mwaana ku mukazhi obe.” Kabiji aye wajinga sebete-faivi, kabiji mukazhi wajinga sikisite-faivi. Kyapwile nobe byo kyubiwa ku banabakazhi, monka mwaila ndonda ya banabakazhi basema baana, pa myaka yavula. Kabiji papo, panyuma ya kwikala nanji kufuma ku kimye kyo ajinga nsongwakazhi, mambo wajinga nyenga yanji kichika, kabiji wakonsha kusema byepi yewa mwaana? Pano mwakonsha kulangulukapo pe Abulahama kuya ku balunda nanji, ne kwamba mba, “Tukekala na mwaana, Sala ne Amiwa”? Mwakonsha kufwanyikizha kyokyo nyi?

<sup>137</sup> Kika, bantu baambile mba, “Awa kamulanda mulongo mukote, pajipo kintu kimo kyatama kwiaeye.”

<sup>138</sup> Ke myendeleo, bino Abulahama wikikwachijiletu. Kabiji kimye kyo ajinga na myaka aduleendi, aye kechi wazhinaukile

milaye yakwa Lesa ne. Aye waimenetu na myendeleko, kine, kasa akwachijila ku kikye.

139 Inge mwamona lupusano luji momwa? Sala waesekele kupana kwi Abulahama, nangwa kupana kwi Lesa, byonkabyo, bunkwashi bucheche, aye mwine. Aye walangulukile mba, mwayukatu, amba, kyakila pa kyalaila Lesa. “Pano, mwayukatu, Amiwa ne mwanamukazhi mukote, bino Hagela papo ke mwanamukazhi walamba. Abulahama kechi wakonsha kumusongola ne, ne aye. Nanchi, mwayukatu, akyo—akyo kikakwasha Lesa. Akyo kikakwasha Lesa, mambo Hagela, apo, aye kape ujitu na myaka tweti. Aye ke wamwingilo wami. Kabiji mwayuka kyo Nkoba? Amiwa kamupana ku mulume wami, ke mukazhi,” mambo paji yaswishiwe. Nanchi aye waambile mba . . . “Nsakumupa, kabiji ukekala na mwaana ku mulume wami, kabiji pano Amiwa po katambula mwaana. Kabiji awa ye iye, Lesa ye alaile.”

140 Mwamona, atweba kimye kyonse tweseka kuubapo kintu kimo; kechi twakonsha kumupembelela Aye ne. Twafwainwa kuubapo kintu kimo, atweba bene. Wafwaijilwe kwikalatu bulongo. Wafwaijilwe kwikala walamba. Wafwaijilwe kumweka wawama bingi, bino kechi kyajinga mwaila Kyambo ne. Lesa wabujile Abulahama mba mwaana ukeya kupichila mwi Sala.

141 Mwavuluka byo Aambile pa Jitanga jajicheche? “Abye biyakilo bikebalondelanga baitabila.” “Byonka byo kyajinga mu moba akwa Nowa, nanchi byobyo kikekala ne pakwiya kwa Mwaana muntu, amo bacheche, bajingatu myeo eiti, bapulukile.” Abyo Byambo kechi byakonsha kukakalwa ne, nanchi twayai tumone pepi pepi atweba bene ne kwikala na Kyambo. Kijitu bulongo. Mwamona?

142 Bantu beseka kulengapo kintu kimo, pakuuba mba kisende kifulo kya kulenga kya kwa Lesa. Mwamona, monka mo Naambila javula, kabiji kapepo kipwilo kasa kikyangye kutatula ne, kasa kikyangye ne, mwayukatu, anweba kechi mwakonsha kwipuzha mikoko ne, “Anweba mwakonsha kundengela booya?” Ine, aye kuuba wikyuba ne. Bino, mbuzhi kechi wakonsha kulenga booya ne, mambo kisemwa kyanji kechi kikamuswisha ne. Nangwatu wakonsha kweseka byepi kukashila booya bwa mukoko pa mbuzhi, kechi kyakonsha kwingila ne. Aye mbuzhi kechi wakonsha kulenga booya ne, kabiji mukoko kechi ulenga suki ne. Bino uji na booya mambo aye ye mukoko. Akyo kyo kimulengela kwikala. Aye kechi ulenga ne.

143 Atweba kechi twafwainwa kulenga bipangwa bya Mupashi ne. Twafwainwa kupanga bipangwa bya Mupashi. Kinchi kya maepo kechi kilenga maepozi ne; akyo kipangatu mambo ke kichi kya maepo.

144 Kabiji inge twaeseka kulenga kintu kiji kyonse, “Amiwa nsakukwasha ku oo Mambo. Amiwa kafunda masukuulu pa

myaka teni. Amiwa nsakufunda *kikye, kyokya*, nangwa *kikwabo*, ne kutambula Bachela wami wa Aat kabiji ne digili wami wa bu Dokotala. Amiwa nsakukwasha Nkambo, buke.” Kechi kyakonsha kwingila ne.

<sup>145</sup> Lesa, monka mukutongwela jimo kwanji, wita yenka Ye aswa. Aye upana Bufumu ku yense Aye ye akeba kwi Bupanako. Twafunda kyokyo kwi Nebukaneza.

<sup>146</sup> Twafunda kyokyo kwi—kwi Yelemiya, kimye Lesa kyo amubuujile kyokyo, kupichila mu Kyambo kya Nkambo, amba, kukekala kimye Isalela kyo bakamusenda kutwalwa mu Babilona pa myaka sebeta. Awe wiya ngauzhi mukwabo. Aye wabuulwa kala, amba, “Pano, anweba mukekala na bangauzhi, bakeya. Kabiji mukeka nabo monka mwa mu Babilona, abo bakeya, ne balota biloto ne bangauzhi, abo bakaula byapusanako na Bibye. Kabiji ba kabuula bantu amba kechi bakateleke kubaabo bantu ne.”

<sup>147</sup> Kabiji kwaishile muntu wajizhina ja—ja, umo wa bangauzhi, Hananiya. Kabiji Yelemiya byo aimene popa na kikokoji mushingo yanji, kwaishile Hananiya, waambile mba, “ABYO BYOBYAAMBA AYE NKAMBO, pa myakatu ibiji, bijiilo byonse bya Nkambo . . .” Bino, mwailatu ndonda, kyamwekele kuwama bingi. “Lesa ukapesha bantu Banji. Aye ukabwezhatu bintu byonse bulongo byonka byo byajinga, mu myaka ibiji.”

<sup>148</sup> Kabiji Baibolo waamba mba, ne ngauzhi Yelemiya waambile mba, “Amena. Amena. Hananiya, lekai Nkambo alenge byambo byenu bifikizhiwe. Bino twayai tulangulukepo kintu kimo, Hananiya. Kwajinga bangauzhi kunyuma yetu, kabiji ba awile na byaalo bikatampe bya nkondo, kabiji ne bikwobotu. Bino, vulukai, ngauzhi uyukanyikwa panyuma ya bungauzhi bwanji bwazololwa.” Mwamona?

<sup>149</sup> Nanchi Hananiya waishile, wafumishe kikonkoji pashingo ya kwa Yelemiya, kumeso a bonse bang’anga ne kipwilo, kapepo milyoni umo na afu wa bantu. Kabiji watolele akya kikokoji Lesa kyo abikile pa shingo yakwa Yelemiya, kyajinga kiyukilo, kabiji wikimokawile bipimvwabipimvwa, kabiji wikitaile pa maulu anji, wasangalala, ne kwamba mba, “ABYO BYOBYAAMBA AYE NKAMBO, mu myakatu ibiji, nishi babwela.”

<sup>150</sup> Yelemiya wamutajile. Kyajinga kyapusanako na Kyambo, nanchi wafuminepotu. Kabiji Lesa waambile mba, “Bwelai kunyuma na kumubuula,” amba, “Amiwa kechi kambapo nanji ne.”

<sup>151</sup> Aye wajinga na lusekelo. Aye watoleletu mulanguluko wanji. Mwamona? Aye kechi wapembejile ne poso aye byo ekimwene kabiji wayukile mba kechi kyajinga aye ne, amba kyajinga Lesa wikyambilenga. Aye wabwelele, na lusekelo. Inge . . .

<sup>152</sup> Twikitana, mwaya kyaalo, leelo. Umo wa matepu etu wajijilenga mu nzubo imo katatakatu, apo pajinga jibumba ja



bamingilo bashinijilwe, kabiji bayishilenga na kubatizhiwa mu Jizhina ja Yesu Kilishitu. Kabiji muntu waimene mu kibamba, ao waambile mujimi ne kwamba mba, “ABYO BYOBYAAMBA AYE NKAMBO. Kwachijilai ku kyo muji nakyō. Twajijilaitu, na kuya, kabiji Amiwa nkemupesha.”

<sup>153</sup> Baambile mba, “Kyawama, inge Nkambo waambile kyokyo, Naketekela mba byokiji.” Mwamona, kechi kyapimwa na Kyambo ne. Kyafwainwa kutola Kyambo, patanshi. Abyo byokiji. Kyajinga kyapusanako na Kyambo.

<sup>154</sup> Pano Yelemiya wabwelele, awa ngauzhi washingwa manyi. Lesa wamubuujiile, mba, “Nayuka mba Hananiya wamokwele kikokoji kyajinga mushingo yobe, kyo Nabikilemo, bino Amiwa nsakulenga kimo kya kyela kya kapotwe.” Aye waambile mba, “Kabiji ne byonse bye byaalo byayilenga na kwingijila Nebukaneza, kalume Wami,” kabiji wajinga muntushi. Mwamona? Kabiji Isalela, walaminenga bitapisho byabo byonse, bino kechi bajinga. . . Mwamona?

<sup>155</sup> Lesa walaile, amba Aye ukebapesha, bino aa mapesho ajinga na po aimana. Kabiji obewa wafwainwa kufikizha abya byatongolwa, pakuuba mba engile.

<sup>156</sup> Kasa naikala, kimye kicheche kyapitapo, kasanji na mucheche, wawama nsongwakazhi kuno. Kitanshi, Amiwa napichile mu kyokya kisemi, pa kumona kana pajipo kintu kimo kyatama. Lesa usa kubuka, bino kiji na pokyaimena. Mwamona? Kintutu kimo kyo Nataine, kyajinga, bainaji bajinga na moyo amba kutoma muchi kyatama. Naambile mba, “Kechi ulanguluke kyokyo ne, nyenga. Fumyamo kyokyo mu milanguluko yobe. Yangatu kulutwe na mwaana. Mupe muchi. Lesa ukekiyukisha kyokyo.” Mwamona?

<sup>157</sup> Pano, bino, kine kintu ke, kutana, yukai. Kabiji pano, inge kiji ABYO BYOBYAAMBA AYE NKAMBO, nishi kiji bulongo.

<sup>158</sup> Pano twatana kuuba mba, abo bantu, bakebelenga kulengamo kintu kimo; Hagela ne—ne Sala, mu kukwasha Abulahama, kukwasha Lesa pakuuba mba mulaye Wanji afikizhiwe. Kuuba wauba kyokyo ne. Kechi kujipo jishinda, nangwa pachechetu ne, ja kwikyubilamo. Ke—ke kintu kyatama mu bintu byonse. Kyambo kya Lesa kikamweka, nangwa byonkabyo. Obewa wafwainwa kwimanatu pa Kyambo, ne kwamba mba, “Kiji *mujije* jishinda,” kabiji lamai Kyambo. Pano, monai, kulenga kintu kimo kya kupingakenya mu kifulo kya Kyambo Kyanji!

<sup>159</sup> Kapepo balunda bakwa Abulahama, ne abo, inge twakonsha kumona, kapepo balunda bakwa Abulahama baishile ne kwamba mba, “Kyawama, shaja mikoka ya bantu, baanga baana bo uji nabo pakino kimye?” Kimye kyo ajinga na myaka aduleendi. “Kwaamba mba, shaja mikoka ya bantu,

shaja bavula, baana baanga bo uji nabo pakino kimye?" Ba kwendeleka!

<sup>160</sup> Bino, kechi wamona kimye nenyi? Bushe kechi twa kimonapo, bimye bimo po twalombelejile kintu kimo, kyabula kumwekanyika nyi?

<sup>161</sup> "Pano paikala mwanamulume mukote," baamba mba. "Aye ye mpofu. Aye kibulu. Aye kamama. Aye wakolwa. Aye wauba *kikye*. Yainga kokwa na kumubuka, obewa lubuko lwa Bulesa. Tusa kwikiketekela."

<sup>162</sup> Bushe bayuka mba ye diabola umo waambile mba, "Fumapo pa musalabo, kabiji Amiwa nsakukwitabila Obewa. Alula ao mabwe ke shinkwa, kabiji Amiwa nsakwikitabila"? Mwamona? Yenka umo diabola wakashile jiponda pa meso a Nkambo yetu, ne kumupuma Aye ku mutwe na kichi, kabiji waambile mba, "Pano, inge Obewa wi ngauzhi, wi tubuule ng'anyi wa Kupuma, kabiji atweba tusakukwitabila Obewa."

<sup>163</sup> Kyawama, mwayukatu Aye wayukile ng'anyi Wamupumine. Aye wafwajilwe kwalula aa mabwe ke shinkwa. Nangwa, Aye wafwajilwe kufumapo pa musalabo. Bino twafwainwa kwikala byepi leelo inge Aye wikyubile? Mwamona? Abo kechi bayuka mutanchi wakwa Lesa ne. Mwafwainwa kutuluka akya Lesa kyo alaile.

Bino Nafwainwa kupelawizhako.

<sup>164</sup> Pano, bino bafwajilwe kwamba mba, "Shaja mikoka ya bantu, twakumwine obewa, myaka tweti-faivi yapitapo, waambile mba ukekala na mwaana mwi Sala, kabiji kufuma momwa mukekala mikoka ba bantu. Uji na baana baanga pa kino kimye, shaja mikoka ba bantu?" Uu! Mwamona? Awa ye mupashi umo wabanda bingi ao wakonsha kujimbulula.

<sup>165</sup> Kika Abulahama? Kyo aambile, "Aye kechi witutwile mumulaye ne, pakubula lwitabilo."

"Kika, kuno walombejile *Kananga-ne-kananga*, kabiji kechi bakosele ne."

<sup>166</sup> Akyo kechi kisakamika ne. Inge Nalombelela teni sauzande bufuku buno, kabiji teni sauzande bafwa lukeelo, keesha bufuku Amiwa kashinganga manyi bakolwa ne kwibalombelela. Lesa ye waambile byoabyo. Kechi kyakonsha kwikilekesha, nangwa pacheche ne. Lesa wikilaile. Amiwa nekiketekela. Kyakine. Kechi kijipo na lupusano na byo bamba ne, nangwa byonkabyo. Bino, bakendeleka. Ayo ke myendeleko ya Kyambo.

<sup>167</sup> Abulahama, waimene pa Kyambo kya Lesa, pa kupezhako Kyafikizhiwe. Oo, ami!

<sup>168</sup> Talai myende-leko ya bung'umba. Byo baendelekelwe, kabiji ne myendeleko ya bung'umba, patanshi. Abo bajinga... Aye wachichikile na myendeleko ya kwikala bung'umba pa yonse ye myaka. Aye wajinga pepitu nobe myaka aduleendi. Aye

wajinga naite, na Kyambo kya Lesa akyo kyaambile mba ukekala *inamfumu*, inaja yuwe mwaana. Kabiji aye ne Abulahama, ba ng'umba, bonse yabo—mibiji yabo yajinga pamo nobe yafwa, bino nangwa byonkabyo kechi bazhinaukile kyokya Kyambo ne, nangwa jimotu ne. Bino bachichikile ku kyokya, patanshi. Kabiji pano, aleluya, Lesa walamine Kyambo Kyanji, mu kyokya kimye kyafishi: Izaka wasemekelwe. “Kabiji lukunwa waji uji pamo nobe busenga bwa kalunga ka meema nangwa tubaangabanga twa Mwiulu.” Mwamona? Lesa kimye kyonse ukumbula Kyambo Kyanji. Ee. Bung'umba patanshi, apa bino ke Izaka.

<sup>169</sup> Zakaliya ne Elizabeta, nobe byonkabyo, awa mwanamulume mukote ne mwanamukazhi mukote, bajingatu bakwachijila na luketekelo. Kabiji Zakaliya byo aishile kokwa, kabiji wakonsheshe kunemba pa selechi, waambile mba, “Aye Malaika wankumenye, ne nkumbula mba Amiwa kasema mwaana mwi Elizabeta, mukazhi wami mukote uno. Amiwa kechi nakonsha kutwajijila nakwamba ne. Amiwa ne kamama. Amiwa kekala kamama kufikatu ne juba mwaana jo akasemwa. Bino kubena kwiya mwaana, kabiji ukekala ngauzhi wa Mwine wakila. Aye ukabulang'ana Ntaanda wa Kumakya. Aye ke muluwe wakutangilako ku kwiya kwa Mesiyasa.” Kyakonsha kwikala byepi?

<sup>170</sup> Bamo baambile mba, “Kamulanda mulongo mukote. Oo, Na—Naketekela mba walubilamo pacheche mu mutwe waji, mwayukatu. Mujipo kintu kimo kicheche. Bino monai kwi Elizabeta mukote kokwa, uji pepi nobe eite. Kabiji talai—talai—talai pe Zakaliya, mwine mukote kabiji ubena kuzakama, kabiji pano aye ubena kwamba kintu kya yewa musango. Kyawama, mulunda kamulanda mukote.”

<sup>171</sup> Bino wajinga na Kyambo kya Nkambo. Myendeleo ya musango yeo, poso byo efiletu moba avula. Bino waikele na Kyambo. Oo, ami!

<sup>172</sup> Wakaine kuyukanyikwa, wakaine milanguluko ya bena kengi, wakaine buwame bwa mujoja juba, ne bya misango kabiji ne bintu bya mu juba jabo. Abo bekikaine. Bakaine kwenda na jibumba ja babula kwitabila. Abo bakaine bintu bya muntanda. Bafwaijilwe kwikyuba, kwikala na Kyambo kya Lesa. Abo bafwaijilwe kwikyuba.

<sup>173</sup> Nanchi byobyo kiji ne leelo. Wipatuleko obewa mwine kufuma ku bintu byonse kanatu obewa ne Lesa. Kechi kyokya kyuba kipwilo ne. Kijitu byo mwauba ne Lesa. Mwamona? Ke obewa, nobe muntu bunke. Ee.

<sup>174</sup> Pakuuba monai Lesa kyo amupele. Kimye Yesu Ayemwine kyo ayishile, Zakaliya wajinga waya, Elizabeta, ne aye. Bino mwaana wabo byo ayishile kufuma mungyetu, na ABO BYOBYAAMBA AYE NKAMBO, Yesu waambile mba, “Kechi kujipo muntu wasemekwa ku mwanamukazhi uji pamo ne aye

ne.” Amena. Kika? Wamanyikilwe myendeleko ya bung’umba. Waiketele na Kyambo, kabiji wasemene mwaana wa yewa musango.

<sup>175</sup> Pamotu nobe Sala wakala, pamotu nobe Abulahama wakala, bamasongola akala bakwachijiletu kwi Akyo. Monai, bavula basemekwapo kala, “baji nobe kuvula kwa musenga wa kukitulu kya kalunga kameema,” kechi kujipo mutundu wa bantu muntanda uji nobe ba Yudeya ne. “Nobe musenga wa tulunga twa meema nangwa tubaangabanga twa mwiulu.” Kika kyamwekele? Kyamwekele mu bacheche, mwaana umo.

<sup>176</sup> Pano mwamona ko Mbena kuya. Mwaana umo, byo byonka byo kyaubiwe. Kyasendele mwaana umo mukusukanya byaalo kabiji ne kutongola kwi Mesiyasa. Watolele umo, wakokela. Abyo ibyo. Lesa ukebatu muntu umo. Akyo kyo kyoka kyo Akeba, kuntu kumo Aye wafwainwa kwikala na jiji. Akyo kyo kyonka kyo Akeba, kwikala na muntu umo mu luusa Lwanji. Oo, byo atemwa kutola muntu umo!

<sup>177</sup> Aye watolele Nowa, kimye kimo. Aye watolele—Aye watolele Mosesa, kimye kimo. Aye wajinga na—na Yelemiya. Aye watolele umo—umo Elaija. Aye watolele umo Elisha. Aye watolele umo Yoano. Aye—Aye u . . . Aye watolele umo Samisoni. Kikulutu Aye wakonsha kutola muntu umo mu luusa Lwanji, aja ke Jiwi Janji. Aye wakonsha kwambila monka. Aye wakonsha kuzhachisha ntanda yonse. Oo, ami!

<sup>178</sup> Byo ekala Aye nazala kabiji ne kukaajila, pakuuba mba atole muntu umo mu luusa Lwanji, “Amba Nakonsha kwambila monka mwiaye. Nakonsha kulengela Jiwi Jami jayukanyikwa. Nangwa wakonsha kwimana ku myendeleko, pakuuba Amiwa kebayukisha Jiwi Jami.” Mwamona? Oo, ee.

<sup>179</sup> Bung’umba, patanishi. Wafwainwa kusema, wafwainwa kwimana ku myendeleko ya bung’umba. Sala wachichikile. Nanchi byo byauble Zakaliya ne Elizabeta pakuuba mba bekichichike.

<sup>180</sup> Talai, leelo. Pano Amiwa nsakwambapo kintu kimo. Talai leelo ku baana ba pite. Aye watola mikoka ya bantu mu butangi bwa bumulwilantanda bwa dinominesheni, pite wanji ne baana banji babakazhi. Monai kisemi kya madinominesheni kyaimikilwe, kabiji bacheche baoloka. Kechi musakamane ne. Ikalai na Kyambo. Kijitu bulongo.

<sup>181</sup> Obewa bakonsha kukwendeleka, watelwa mba wakyongo-kyazhila. Obewa wakonsha kutelwa onse, jonse jizhina jatama. Bino, ikalai ponkapa, Ke Kyambo, myendeleko ya Kyambo, kintu kyo bakonsha kwambapo kwi obewa.

<sup>182</sup> Mulongo umo mwanyike, aye wafwainwa kutanwa muno lukeelo luno. Aye ke mulunda nami; Jim Poole, Jimi mwanyike, banji—bantu banji. Aye bamwipwizhe juba jikwabo. Kyawama, aye wabatizhiwe kuno. Muntu umo waabile kwi aye mba,

“Inge obewa ukabatizhiwa mu kipwilo, kika kyo wabujila kutola kipwilo kikatampe, kintu kimo?” Mwamona? Bino aye wamwene Kyeya. Akya kyajinga ikyo. Mwamona?

<sup>183</sup> “Bavula ke baana ba babula koloka kukila baji mu baoloka.” Ee. Kijitu bulongo. Bachepe byepi, babaoloka! Monai byo bajinga bacheche mu moba akwa Nowa. Mwamona? Talai byo kyajinga mu moba a Sodoma. Mwamona? Bajinga bacheche byepi baoloka!

<sup>184</sup> Baanga baana pite bo aji nabo! Aye usematu baana mujishinda jiji jonse, bino bonse ke baana bamubukende. Pite usema bapite. Kabwa usema kabwa.

<sup>185</sup> Kabiji Kilishitu uleta bashingwa manyi. Aye Baibolo uleta bololoke, nanchi twafwainwa kwikala na milanguluko ya jibumba jicheche. Ke kintu kyawama bingi!

<sup>186</sup> Talai pa kipwilo kikatampe kya Efisesa, mwajingatu twelufu mwi akyo. Ee. Monai jibumba jotuji najo leelo, lubaji lwabo. Ee.

Kwajingatu myeo eiti mu moba akwa Nowa.

<sup>187</sup> Kwajingatu faivi mu moba akwa Lota, ine, foolo; Lota ne mukazhanji, baana babiji. Kabiji aye waalulukile ke sumba ya mukele panyuma ya kulupukamo, ponka pakutalatu kunyuma. Kukijishamo, mwalupukiletu fiili mu joja juba.

<sup>188</sup> Kabiji Yesu waambile mba, “Byonka byo kyajinga mu oa moba.” Kitufwainwa atweba kutajisha bulongo ne kujimuka. Pano baoloka bachepe byepi! Bino, nobe kimye kyonse, bamyendeleko bafwainwa kwendeleka. Ba bung’u- . . . Bachichika myendeleko ya bung’umba, patanshi. Ami!

<sup>189</sup> Nafwainwa kupelawizhako. Amiwa. . . Amiwa kechi. . . Mbena kukeba kukwasha babo baana. Bandekeleketu pacheche. Mwamona?

<sup>190</sup> Bantu kimye kyonse bajitu pamo. Pano Mbena kwambapo kintu kimo ne jikwabo. Kabiji Nakeba anweba. . . Kabiji Amiwa kechi nayuka ne kana kyabikwa pa tepu, nangwa ine. Bino inge kiji pa tepu, Nasaka namba anweba muteleke kwi amiwa, anweba muji pa tepu. Kechi kimupite ne akye, bino kifundai. Muntu pano ujitu pamo nobe byo ajinga kimye kyonse. Aye utakaika Lesa pa byo Aubile; ne kutala kulutwe ku byo Akooba; kabiji kasa alubako byo Auba ne byo abena kuuba. Aye utakaika Lesa pa kyo Auba; aye utala kulutwe pa byo Akoba; bino kasa alubako byo abena kuuba Lesa, kabiji ponkapo wapusa bintu byonse. Naketekela mba bikimona. Mwamona? Kasabalubako byo abena kuuba! Aye wayuka byo Auba; kabiji aye wayuka mulaye byo Akooba; bino aye wakakalwa kumona kyo Abena kuuba.

<sup>191</sup> Oo, anweba ba Pentekosito, inge kechi mwikyakumwenako ku kyokyo ne! Obewa ubena kupembelela kintu kimo kumweka: nobe kimye kyonse, kyamwekele mushi yobe, kabiji obewa

kechi wikiyuka ne. “Jiinga Aye jo akemufukamina, nobe kyaje wafukamina pa make anji, bino anweba kunswa ne.” Anweba mulanguluka kyabaya pa bisho byenu ne madinominesheni kukila byo muuba pa Kyambo Kyanji kabiji ne pa Mupashi Wanji. Ee.

<sup>192</sup> Myendeleko ya byepi kwi Maliya! (Kimye kyo tubena kushiika.) Yajinga myendeleko kwi Maliya ne Yosefwa, na mambo a Kyambo Kyanji! Ke kimye kya Kimishimishi. Nanengezhenga kwikalako na kintu pacheche, bino anweba mwikyumvwa javula pa waileshi kabiji ne mukachi ka bakafunga, ne bikwabotu. Myendeleko ya byepi kwi Maliya ne Yosefwa, pa ku kwachijilatu ku Kyambo kya Lesa kya mulaye! Vulukai, pano. Kabiji aya mijimbulwila, yaletele tuseko, byo bamwene Maliya mucheche ke apite, byo bamwene Yosefwa. “Obewa ubena kusongola pite.” Mwamona? Kabiji vulukai, mulongo, bukende kyajinga ke lufu mu oa moba. “Pano, obewa wamulama amba kechi epayiwe ne. Aye ukekala maama ku lubaji lobe.” Kabiji, bino, vulukai, kimye kyonse, Lesa waingijilenga nabo, kabiji kyajinga mwaila Kyambo. Kabiji abo kechi bekiyukile ne. Mwamona?

<sup>193</sup> “Kisungu ukasema mwaana.” Yosefwa wayukile kyokyo. Maliya wayukile kyokyo, mambo, panyuma ya Kyambo kyanembwa, kwajinga Malaika wisambilenga nabo, na kushiniikisha, nangwa kusolola akya kyonka Kyambo kyanembelwe, akyo kikamwekanyika. Kechi biloto ne. Langulukai. Aye Mupashi Wazhila waishile pantanda; kechi waambilepo ku kipwilo kyonse ne. Aye waambiletu kwiabo.

<sup>194</sup> Yosefwa watajile. Kabiji Malaika kasa akyangye kumupepula, waambile mba, “Kyawama, pano, Namutemwa. Bino, Amiwa ne muntu waoloka. Amiwa kuba nasongola mwanamukazhi muyewa musango ne.”

<sup>195</sup> Kabiji Malaika wa Nkambo wamumwekele, mu kiloto, kabiji waambile mba, “Yosefwa, obewa mwaana Davida, kechi uchine kumusongola Maliya mukazhi obe ne, mambo awa ye aimita yewakwa Mupashi Wazhila.” Oo, ami! Lutekenesho lwa musangoka! Mwamona?

<sup>196</sup> Kabiji, Maliya, mujishinda janji na kuya ku mushima. Kisungu mucheche, pepi nobe myaka sebetiini, eitiini, ku songolwa ku mwanamulume wasongolwapo kala kabiji uji na baana foolo; mwanamulume mukote. Kabiji aye wajinga... Wamutemenwe, kabiji—kabiji kechi wayukile ene mambo ne. Kabiji aye wamutemenwe, kabiji kechi wayukile ene mambo ne. Kabiji byo bajinga. Kwiya, na kuya ku mushima, na kusenda meema, kabiji byonse bya kufunda pa bintu abyo aye—aye byo alangulukilengapo, Binembelo, kwakubula ne luzhinauko ne, kabiji ponkapo Kyeya kyamwekele kulutwe yanji. Akya Kyeya byo kyamwekele, akwa kwa imene Malaika.

197 Nakumya kana maliya mucheche waumvwine byepi? Bushe mwakilangulukapo pa kikye nyi? Nakumya kana waumvwine moyo byo Naumvwine keesha japita.

198 “Mutende, Maliya!” *Mutende* kyalumbulula mba “lekai.” “Tai muchima ku byo Nsakwimubuula. Watokwa obewa mu banabakazhi, mambo obewa watalwa bulongo kwi Lesa, kabiji ukasema Mwaana. Kwakubula kuyuka mwanamulume nangwa umo ne, bino ukekala na Mwaana. Kabiji muvuala obe Elizabeta, byo aji mukote, ne aye, waimita ne aye, kabiji ukasema mwaana. Kabiji abye biyukilo bikobiwa.”

Aye waambile mba, “Pano kikekala byepi, mwayukatu, byo Nabula kuyukapo mwanamulume ne?”

199 Aye waambile mba, “Aye Mupashi Wazhila ukakunyeng’amina. Akya Kintu Kyazhila kikasemekwa kwi obewa ukatelwa mba Mwaana wakwa Lesa.”

200 Lekai ba kwendeleka bambe kyobakeba. Aye wikiyukile. Aye wayukile mba byo kikekala, mambo Lesa ye wikyambile.

201 Bino, wafwaijilwe kumvwa byepi, aja juba ja kupesha, nangwa pakwiya kwa mukanda wa Mwaana, byo aendelenga na yuwe Mwaana mucheche mu maboko anji, nobe *byobya*. Kabiji banabakazhi bonse kechi bafwenyenye kwipi ne aye ne, bonse bajinga na byawama byakupikula, pa kupesha baana babo kabiji ne pa kwibatwala ku mukanda, kabiji pepi nobe bonse basendelenga mwanamukoko. Bino wajinga na tutela tubiji, twanji twa kutokeshiwa aye mwine. Awa Mwaana mucheche wapombelwe mu bisapi, byalengwa kufuma ku kikokoji kyapashingo ya ng’ombe, kikokoji, kyakupomba pa musana wa ng’ombe. Abye byajingatu bisapi bya mukijilamo banyama. Abo kechi bajingapo na kintu kimo Kyanji ne. Bajinga bingi na buyaji. Kabiji byo aimene.

202 Kechi kyaluzhinauko ne, banabakazhi bonse bafuminengako ku kisungu mucheche. Baambile mba, “Mwamona, uji na mwaana wa mubukende.” Monai Lesa byo alenga bintu byaikala na-mwekelo yatama. Oo, ami! Aye umvwetatu booya pa meso akwa Satana. “Kyajinga kyabusaji bingi! Kyajinga kya ndochi bingi! Bukende. Abyo byo aji. Awa ke kende.” Akyo kechi kyalekele muchima kulukuta wakwa Maliya mucheche ne. Abo baikele palepako kufuma kwi Aye.

203 Abo babena kubatu bintu bimo, kasa bamutela Aye mba, “Uba kyongo-kyazhila, nangwa bakisangajimbwe,” nangwa kintu kimo.

Maliya wayukile awa Mwaana Wajinga ubang’anyi. Aye watwajijiletu, mumusangotu umo.

204 Bino, oo, bino abo kechi bakonsheshe kumona kimye, Shimeona, kyo aikele kunyuma mu kibamba, aye bamulaile? Aye waile nakuzhokoloka, kasa abena kwaula. Aye waambile

mba, “Aye Nkambo wamwekele kwi amiwa.” Kabiji waambile mba, “Amiwa kechi nkamona lufu ne. . .” Kabiji wajinga na eite-ne ikwabopo akya kimye. “Amiwa kechi nkamona lufu Nkasakyangye kumona lupulukilo Lwanji ne.”

<sup>205</sup> “Oo, Shimeona, wi mukote, mwaana. Obe—obe. . . Mulongo mukote walubakanako mu mutwe wanji, mwayukatu, aye ujiko pacheche. . . Mulekaitu bunke bwanji. Aye wabula bulume. Aye kechi wakonsha kukozhapo muntu nangwa umo ne.”

<sup>206</sup> Pakuuba Shimeona wajinga na Kyambo kya nkambo, waambile mba, “Namwene Mupashi wa Lesa kasa ekila pe amiwa. Naimene ne kutala pe Aye. Aye wambujile mba, ‘Shimeona, wi muntu waoloka. Kabiji obewa kechi usakuya. . . Amiwa nsakukulenga obewa kwikala lushimuno kokwa.’” Uuu. Byo byonka.

“Kika Anweba kyo mukoobila byo byo, Nkambo?”

“Ao yemwingilo Wami.”

<sup>207</sup> Milanguluko yami ke, kyakuuba mba Aye kine uketulwila makala pe abo, pa joja Juba. “Obewa wajinga na kamonyi. Kika kyo wabujile kwikiteleka?”

<sup>208</sup> Amwa mwajinga mpofu mukote Anna, waikele mu tepo, na kulomba. Aye Nkambo wamusolwejile, “Shimeona ujitu bulongo.” Amena. Aye kechi wamwenenga kyeya kya mute kyapusana na mfishi ne, bino wakonsheshe kumona palepa kukila bantu bavula leelo baji na meso awama. Aye wamwene, mu Mupashi, kwiya kwa Mesiyasa kwajinga pepi, Mupashi kasa abena kwenda mu muchima wanji.

<sup>209</sup> Monai kyokya kipwilo kicheche kyajingako? Zakaliya, Elizabeta, Maliya, Yoano, Anna, ne Shimeona; sikisi kufuma mu mamilyoni. Nobe mu moba akwa Nowa. Sikisi ba mwiabo. Lesa waingijile na umo umo wa mwiabo. Bonse bajingatu mu mutende. Bonse bapwijilengatu pamo. Amena.

<sup>210</sup> Uno, Shimeona mukote. Awe ke atwele Mwaana mucheche. Aye kechi wakyumvwinepo kintu nangwa kimo pa kikye ne. Uno mwaana. Kabiji nanchi Shimeona waikajile mu kibamba kyanji, kabiji ne Mupashi waishile pe aye, ne kwamba mba, “Lupuka, Shimeona.”

<sup>211</sup> Awe ke aaye, na kwenda, kwakubula ne kuyuka nkoailenga ne. Nobe Abulahama, aye wakebelenga kintu kimo. Aye kechi wayukile po kyajinga ne, bino watwajijiletu na kwenda. Pakupitapo kimye, waimene. Kabiji Mupashi Wazhila wafwajilwe kwamba kwi aye mba, “Awa Uji popa.”

<sup>212</sup> Aye waile, mu maboko akwa Maliya, wasendele Mwaana mu maboko anji. Watajile peulu ne kwamba mba, “Nkambo, lekai kalume Wenu afumepo mu buno bumi mu mutende. Meso ami abena kutala pa lupulukilo Lwenu.” Kintu kicheche bonse kyo



basekelenga, kyoka banabakazhi kyo bachiinenga, Shimeona waambile mba, “Ke lupulukilo Lwenu, Nkambo.”

<sup>213</sup> Kabiji pa kyokya kimye, awe wiya mwanamukazhi mpofu mukote, kwenda na kuzhokoloka, na kutelengela mukachi ka jibumba. Kabiji wayishile kwi Aye, kabiji ne aye waawile, mambo wamupembejilenga Aye. Aye wamubuujile Maliya mba, “Poko ikasa mu muchima obe, bino Kikasolola milanguluko ya michima ya bavula.” Mwamona? Kyajinga kika?

<sup>214</sup> Bino, Nalanguluka mba, bamo bamwiabo banabakazhi baambile mba, “Pano monai kyokyo! Mwamona musango wakipimo kyakyo byokiji? Abyo byobyo kiji. Mwamona? Akyo byokiji. Monai po kiji? Awa mwanamulume mukote, walalaika mu mutwe. Awa uji kokwa, waimana kuyewa nsongwakazhi pite, kasa abena kwamba kintu kyamusango yewa. Abyo byobyo kiji. Awa Mwaana wa mubukende. Talai pe yewa Anna mukote, waikala panshi papo, ubena kufwatu nazala, kabiji kasa abena kuuba byamusango yewa. Aye kechi ukekalapo na kusangalala nobe byonka byo tuba ne. Bino, abyo byobyo kiji, mwamona. Aye wakonsha kwikala membala wa mu bipamo bya mu kyaalo muno. Aye wafumine mu kisemi kyawama bingi, monai, kabiji wakonsha kwikala monka. Bino abyo byoaji. Monai aja jibumba byo jakwatakana pamo?” Oo, ee. Amena.

<sup>215</sup> Kintutu kimo leelo. “Waikala mu mampuzha a Mwiulu mwi Kilishitu Yesu, kasa abena kusutulwa na Mupashi Wazhila.” Kine. Ee, mwane.

<sup>216</sup> Oo, bushe tuji na kimye kyabayako? Nafwainwa kwambapo kintu kimo. [Kipwilo kyaamba mba, “Ee.”—Waku.]

<sup>217</sup> Amiwa njina byubilo bya muntu mukwabo papo, Po mbena kutala, pa kyokya kimye Kyambo byo kyamwekele kusololwa, banabalume bamaana.

<sup>218</sup> Nanchi inge Najinga na kimye, Fred, pakuuba mba anweba mutange kikyeye. Anweba muji nakyo mu pokochi wenu nyi? [Mulongo Fred Sothmann waambile mba, “Ee.”—Waku.] Naketekela mba anweba bavula mwikimwenepo mu magazini.

<sup>219</sup> Akya kintu Mupashi Wazhila kyo aambile popa pa mukola, pa myaka saate-fiili yapitapo, abo po bekizhikwile. Kuvumbi pa jabu 9, kwikishiniikisha, mambo abooba bamaona byamwiulu, byo bamba mba—mba Yupita ne totwa tubaangabanga, byo tutaatama!

<sup>220</sup> Baji na wakala wa byamwiulu kale-... panwemba bibye, bazhikulula. Akya kine kyo kimye atwe tubaangabanga po twayishile, mu kubungakana pamo kwa tutwe tubaangabanga, kabiji twaile jatala ku Babilona, kabiji ne banabalume bamaana betuletele kuno. Mwavuluka nyi? twakilang’enye bifulo byato, twaishile panshi, mambilyoni a kyeya kya myaka kwabenamo ne jikwabo. Kabiji aba banabalume ba Yudeya bajinga ku Babilona, bamwene akwa kubungakana kwaiya mu kubungakana pamo,

kwatotwa tubaangabanga. Atwa tusatu twaendele, pamo, ne kulenga yewa umo taanda wakumakya. Kabiji bayukile kupichila mu Kyambo kya Lesa, amba akya kyajinga kimye, atwa tubaangabanga potwiiya pamo, kabiji aye Mesiyasa wafwainwa kwikala panopantanda.

<sup>221</sup> Ao oene mambo kyo batatwijileko, “Uji kwepi Aye, wasemwa Mfumu wa ba Yudeya? Uji kwepi Aye? Kuntu kumo! Mambo, umvwe atwa tubaangabanga twaiya pamo, poso mibiji yato ya lukumo yaikala ke mubiji umo mukatampe walukumo, umvwe atwa tusatu twaendela pamo, Mesiyasa ukekala panopantanda pa kyokya kimye.” Kabiji byo twaendele mubifulo byato, aba banabalume bayukile mba Mesiyasa uji panopantanda.

<sup>222</sup> Bajinga basendwe mu mwingilo wabo. Bajinga banabalume bayakuwa. Bajinga basendwe mu mwingilo wabo wasayaasi wabupopweshi. Bamwenenga lubaji lwakyo lwabupopweshi. Kabiji bamwene atwa tubaangabanga twaenda kuya kokwa, Yupita ne Sagasi, kabiji twabwela twaendela kwato—kwato ku lubaji. Kabiji baambile mba, “Twayuka mba Mesiyasa uji kuntu kumo. Nanchi, Aye wafwainwa kwikala mu Yelusalema, mambo akyo kyo kifulo kya mutwe wabupopweshi bwa panopantanda, bwa bupopweshi bwakwa Mesiyasa. Akya kyo kifulo kyabo kikatampe. Akya kyo kifulo kikatampe kya madinominesheni. Akwa iko jibumba ja basapwishi mu buntangi nkojikala.”

<sup>223</sup> Kabiji bakajijile pa bang’amela, myaka ibiji, na kupita kwabuka Mukola wa Tigilisi, kabiji ne kupita mubisensa ne mu masaka, na kwenda, kuya ku muzhi, michima yabo yayula na lusekelo.

<sup>224</sup> Bayukile kimye tubaangabanga po twakobamine momwa. Kabiji akye, ne bapalanguzha mulwelele baamba, leelo, “Inge kine atwa, atwa tubaangabanga, twaiya mu kyokya kifulo jibiji, kyakonsha kulenga kabaangabanga kamo, kufuma po baimene, pa kutalako.” Bino baimene kufuma pa kyokya kifulo, pakuuba mba be kamone. Amena. Amena.

<sup>225</sup> Kiyilatu po waimena. Kiyilatu mu kyo ubena kukeba. Uu-uu. Ee.

<sup>226</sup> Nanchi be kamwene, kabiji be kalondejile, kabiji bajingatu monka mu ndonda. Nangwatu kwepi nkobafikile, kajingatu mu ndonda nabo. Kebatangijilenga. Mwamona?

<sup>227</sup> Ajo jojishinda jakumwenamo ndonda ya Binembelo, bintu byonse, nanchi ikalai mu yewa mulaini na Binembelo. Ajo jo jonka jishinda. Jikakutangijila kuya konka kwi Aye. Kyakine kikobiwa.

<sup>228</sup> Pano monai. Abo ke beye, na kujila, “Uji kwepi Aye, wasemwa Mfumu wa Bayudeya?” Monka mu Yelusalema, Kabaangabanga ke batangijile kufika kokakwa, konka ku kifulo kikatampe kya madinominesheni. Pakuuba byo ba alulikijile

kulubaji lungi, Kabaangabanga kebanshiile. Monka mu muzhi mobayile, peulu-ne-panshi mu mukwakwa. Balangulukile mba muzhi usa kuyula na lusekelo lwa Lesa. Peulu-ne-panshi mu mukwakwa, na lusekelo, bayilenga, na kubijika, “Uji kwepi Aye wasemwa Mfumu wa ba Yudeya? Twamwene Kabaangabanga Kanji byo twajinga ku Musela, kabiji twaiya na kumupopwela Aye.”

<sup>229</sup> Vulukai, Kabaangabanga, bayilenga ku muzhika. Bajinga ku Musela. “Kumuzhika nakutangijila, nakuyatu kulutwe. Nakwibatangijila ku...” Mwamona? Abo bajinga kine... Bajinga... Kyawama, Babilona ne India biji ku Musela wa Palasitani, nobe ku bulengemusela. Kabiji bayilenga na kutala ku kumuzhika. “Kumuzhika na kutangijilwa,” anweba mwamuyuka lwimbo, “nakuyatu kulutwe. Tutangijilai ku kyokya Kyeya kyalumbuluka.” Mwamona? Abo, banabalume bamaana, baishilenga ku muzhika. Kusha Musela, kasa baya ku muzhika, kabiji bekamwene aka Kabaangabanga. Pano, inge bajinga ku Muzhika, pakutala kunyuma, kechi Bekamwene ne. Mwamona?

<sup>230</sup> Abo, byo bafikile kokwa, Kebatangijile kufika konkakwa, ipo po Kebashile. Kabiji abo balangulukile mba, “Kiji bino. Aka Kabaangabanga ke banshile, nanchi pano byokiji.” Baji mu muzhi. Nanchi, “Oo, ami,” baambile mba, “muntu yense ubeena kwimba ne kusangalala. Lukumo lwa Lesa lwasutula bintu byonse. Nanchi, tuji pano. Twayuka mba byetu—twayuka mba bya kumwenamo byetu, byo twamwene akwa kubungakana, kafwako nangwa umo ne, kafwako sendwe, wakonsha kuya kokwa na kwibabungizha pamo ne. Kabiji twayuka, inge atwa—atwa tubaangabanga twafikile mu mubiji wa mwiulu, akya kyo kimye Mesiyasa kyoanji pantanda. Mesiyasa uji pantanda.”

<sup>231</sup> Kabiji pakupitapo myaka aduleendi yavula, ba bungakana jibiji, mwamona, kabiji kwikala kya bupe kiya panopantanda. Monai.

<sup>232</sup> “Mesiyasa uji panopantanda, kimye atwa—atwa tubaangabanga twabungizhiwa pamo.” Kabiji bayukile mba Uji konka, nanchi baile ku maofweshi akatampe a bupopweshi, kabiji batatwile kuya, ne kwamba mba, peulu ne panshi bayilenga mu mukwakwa, abo bangamela, “Uji kwepi Aye? Uji kwepi Aye? Uji kwepi Aye wasemwa Mfumu wa ba Yudeya? Twamwene Kabaangabanga Kanji ku Musela. Aye uji kuno pantu pamo. Uji kwepi Aye? Uji kwepi Aye? Uji kwepi Aye?” Uu! Ke myendeleko!

<sup>233</sup> Baile ku pulisiti mukatampe. Aye waambile mba, wafwaijilwe kwamba mba, “Lukatazho luji pepi anweba balongo? Kika, anweba jibumba ja kisangajimbwe!” Mwamona? Myendeleko ya byepi, monka mwaila byakumwena bya kisayaasi! Kupichila mu bulume bwa Lesa, bamwene

Kabaangabanga Kanji. Kabiji bajinga banabalume bamaana, bajimuka. Bajinga mu mwingilo wa bupopweshi kwasayaasi. Kabiji bayukile, kimye atwa tubaangabanga byo twafikele popa, Mesiyasa uji kutu kumo. Kabiji pano, kifulo kyafwaijilwe kwikiyuka, abo kechi Bekiyukile ne.

<sup>234</sup> Nakonsha kulanguluka, banyike baimana mu mukwakwa, ne kwamba mba, “Ha! Talai pa kyokyo. Ha! Ajo ke jibumba ja kisangajimbwe. Telekai kwi abo, kwaamba mba, ‘Uji kwepi Aye, wasemwa Mfumu wa Bayudeya?’ Abo kechi bayuka mba Helonda uji kuno ne. Abo kechi bayuka Bishopu *Kananga ne.*” Oo, ami!

<sup>235</sup> “Uji kwepi Aye wasemwa Mfumu wa ba Yudeya? Twamwene Kabaangabanga Kanji ku Musela.”

<sup>236</sup> Baamba mba, “Iyai kuno, anweba bonse banabalume bamaana kuno, muji kuno.” Uu-uu. “Iyai kuno. Bushe anweba bonse mwamonapo Kabaangabanga kuji konse nyi?”

“Oo, Amiwa kechi nakimonapo kintu kiji Byobya ne.”

<sup>237</sup> “Anweba bonse batala pa bya mulwelwe muno. Bushe mwamonapo Kabaangabanga kuji konse?”

“Ine. Ine.”

“Bushe mwamonapo kintu kiji kyonse kibena kumweka nobe kiyukilo kyakukumya?”

“Ine. Atweba kechi twamonapo kintu kimo kiji byo byo ne. Ine.”

<sup>238</sup> Kechi kyakimwekapo ne, nangwa byonkabyo. Kintutu kimo. Abo kechi bamonapo nangwa kimo ne. Abo kechi bakonsha Kwikimona ne.

“Uu, twayai twite ba—bamingilo. Pano nga anweba bonse?”

“Ine. Atweba kechi twamonapo Kabaangabanga ne.”

<sup>239</sup> “Kyawama, pano nga anweba balongo mulama kimye, konka kuno pa lubumbulu? Anweba mumona tubaangabanga. Anweba mwayuka byons... Anweba mwayuka kubungakana konse kwikalako mwiulu. Anweba mwayuka kabaangabanga konse. Bushe mwajikumonapo kintu kimo?”

“Ine. Atweba kechi twamonapo kintu ne.” Bino Kajinga konka.

<sup>240</sup> Lukumo lwikale kwi Lesa! Oo, ami! Kechi mwi Kimona ne? Kiji ponka pakino kimye, kabiji kechi bakonsha Kwikimona ne. Kibena kuya, na kuzhokoloka ponka po baji, kabiji kechi bakonsha Kwikimona ne.

<sup>241</sup> “Ine. Atweba kechi twamonapo kintu nangwa kimo ne. Oo, Naile konka. Amiwa kechi namwenepo kintu nangwa kimo ne.” Kine, kechi muba ne. Ke bumpofutu bwinebwine. Kechi kyenu anweba mba mwi Kimone ne. Mwamona? Inge anweba mwi bampofu, kika, kine, anweba kechi mu Kekimona ne.

242 Kijitu ku booba Lesa ko Akekisolwela. Awo ye yenka Wikimona. Kimye kyonse kikala muyekao musango. Kine.

243 Kyajinga Nowa wamwene mvula mwiulu, mwayukatu, bino bashala kechi bekimwene ne. Mwamona? Abo kechi bamwene mvula kookwa ne, bino Nowa wi imwene.

244 Wajinga Abulahama wamwene Sala kasa alama mwaana. Abyo ibyo. Kechi ba kajimbuluzhi booba aambile mba, “Shaja mikoka ya bantu ne, baanga baana bo uji nabo kino kimye?”

245 Byo twakonsha kupita monka mu Baibolo, mankulo kabiji ne bangauzhi, kupitatu monse! “Lwitabilo ke bukamonyi bwa bintu bibula kumweka ne.” Abo bayuka mba Kyambo kyo kikyambile, kabiji abyo byokiji. *Abwe* ke bukamonyi bwa kikye. Abo bekimona. Pano monai. Oo, ami!

“Banabalume betu bamaana kechi bamona awa Kabaangabanga ne. Kechi pajipo Kijipo ne.”

246 Kika? Kine, kimye kyo batajilenga, kabiji batwelelemo na joja jibumba, Kabaangabanga kafuminepo.

247 Kintutu kimo ne leelo. Akyo kyo kilengela Kyeya kyabavula kuzhima, abyo ibyo, ke kukwatakana pamo na joja jibumba ja byobya, abo babula Kwikitabila ne, patanshitu. Kabiji tukekala byepi na—na kabungwe ka kwimenako bipwilo? “Twakonsha kwendela pamo byepi kana twaikala baswang’ana?” Nga lumvwang’ano lwa bupopweshi bwa...bwa baabo kuno, mwaya-ntanda, byonse—byonse bipwilo, kukwatakana kwa bipwilo bya muntanda? Tusa kukwatakana pamo byepi, kasa twaabenamo mamilyoni mailoshi? Mwamona? Tusakwikyuba byepi? Ba Evanjeliko ne atweba, kabiji ne *bibye*, ne *byobya*, ne *byobya*, kabiji bonsetu pamo, kabiji nangwa byonkabyo kukwatakana pamo na jibumba ja bubole.

248 Lesa ubena kufumyamo Mukazhi ao watoka, wazhila, waikala wabula kumvwangakana, waikala na Kyambo Kyanji. Kijitu bulongo.

249 Yesu waendelekelwe na mambo a Kyambo. (Kabiji tusakuleka, mu kakimye kachechetu.) Yesu waendelekelwe na mambo a Kyambo. Talai kuno. Aye wachichikile byepi ku myendeleko, Aye byo ajinga wa Bulesa, mu mubiji mwaikala Lesa? Aye wajinga Lesa, Ayemwine, waalukile ke muntu.

250 Bino, mwayuka Baibolo waamba byobyo. “Twa mukwachile Aye. Bamalaika Bamumwene.” Anweba langulukaitu pa kyokyo. Naketekela Timoti wikibika nobe bibye. Mwamona? Amba, “Pakubula ne mapata ne kyafyamika kya bulesa kyo kikatampe; mambo Lesa wamwekele mu bumuntu, bamumwene ku Bamalaika.”

251 Bamalaika bajinga pa kusemwa Kwanji. Bamalaika byo batajile ne kusangalala, byo batajile mushi mu kyakujilamo banyama kabiji bamwene Lesa mu mubiji wa bumuntu. Amena.

Kechi kyakukumya ne byo batatwile kubijika, “Leelo, mu muzhi wa Davida, mwasemwa Kilishitu Mupulushi.” Bamalaika basekejile, kabiji balupwile byapi byabo bikatampe pamo, kabiji monka mu tutumbatumba twa mu Yudeya, baimbile mba, “Lukumo lwikale kwi Lesa mwiulu mwine, mutende pantanda, kabiji buwame bwikale ku bantu.” Bamwene Kyambo kya Lesa, byo be Kitajile, pakuuba mba be Kimone kimwekanyike. Kabiji byo Kyajinga.

<sup>252</sup> Bino, Satana kechi waketekejile kyokyo ne, mwayukatu. Aye waambile mba, “Inge Obewa wi. . .”

Aye Malaika waambile mba, “Aye iye.” Alo lolupusano.

“Inge Obewa wi, uba *kikananga-ne-kikananga*. Twayai tumone Obewa wikyube.”

Pakuuba Malaika waambile mba, “Uji konka.”

<sup>253</sup> Banabalume bamaana na sayaasi wabo wa bupopweshi, baambile mba, “Aye uji konka.” Amena.

<sup>254</sup> Ao oene mambo basendwe balondaizha byakala biji mu munshiji ne byonsetu leelo babena kupoya bibye bintu, abyo bya awilwe myaka icheche yapita kunyuma, amba bikeya kufikizhiwa. Kabiji baji baji konka, babena kupoya. Abo kechi baji. . .

<sup>255</sup> Kechi kujipo jishimikila jaamba mba Pontiyasi Pilato waikalepo pantanda ne. Bushe mwayuka kyokyo nyi? Anweba bamo baana basukuulu mbulai kwepi kuji jishimikila jaamba mba kuji Pontiyasi Pilato. Kabiji babula kwitabila bendeleka pa kikyke kabiji ne kwikiletela bisela, baamba mba, “Kechi kwajingapo mwina—Mwinaloma ndamakyaalo watelwa mba, aye—aye kafinyala watelwa mba, Pontiyasi Pilato ne.” Bino pepi nobe milungu sikisi yapita, bapoyele jibwe ja kintendekesho: Pontiyasi Pilato, ndamakyaalo. Oo, ami! Aamo kechi muji maana ne!

<sup>256</sup> Baamba mba, “Kechi kwajingapo Lamusesi mu jishimikila ne, Lamusesi kuntangijila Ijipita.” Pakuuba bapoile jibwe, busendwe bwabyakala biji mu munshiji: Aye Lamusesi, wa bubiji. Monai.

<sup>257</sup> Kabiji baambile mba abya bibumba kechi byaponene panshi ne. Basendwe ba byamumunshiji bapoilenga kuzhokoloka, kabiji, kintu kitanshi mwayukatu, bapoile, kuyatu konka kwajinga bibumba bya mu Yeliko byaponene, mwayukatu, kimye tolopita po yavumine. Baambile mba, “Akya kyajinga kya kufwanyikizhatu, lwimbo umo ye aaimbile, waimbilwe kunyuma kokwa.” Ee. Bamyendeleko bamba byobyoye. “Akya kyajingatu kya kufwanyikizha. Kechi kwajingapo ne bibumba byaponene ne, kabiji ne Yoshiwa kwimba tolopita, ne kunyemena ku bibumba ne kupona byapona. Kechi kwajingapo kya musango yeo ne.” Kabiji umo wayakuwa Mwinakilishitu sendwe wa

bya mumunshiji watwajijiletu na kupoya, mambo wayukile mba kyafwainwa kwikala byonkabyo. Aye wapoile ma fiiti kukila-pasate, panshi ponka pajinga byonse. Kwajinga bibumba, byalumbama peulu ya kikwabo, monkatu mwaambila Kyambo.

<sup>258</sup> Baambile mba, “Kechi kwajingapo kintu kyakuuba mba Davida waambilenga pa kyombesha kyanji, kya mizhinge, mambo nyimbilo ya pa mizhinge kechi yayukanyikilwe poso mu fiifiitiini aduleendi.” Baambile mba, “Kechi kwajingapo kintu kya musango yeo ne.” Benakilishitu basendwe bapoya bya mumunshiji bapoile, monka mu Ijipita. Myaka foolo sauzande yapitapo, bajinga na byombesha bya mizhinge. Amena. Oo, ami!

<sup>259</sup> Baambile, pa baana ba Kihebelu balengelenga mabwe ne bintutu bya musango yewa, kufuma ku nenge, “Kechi kwajingapo kintu kya musango yeo ne.” Basendwe ba byamumushiji bapoile kokwa. Kika kyo bataine? Ao ke sayaasi. Kika kyo bataine? Bibumba bya muzhi abyo Bahebelu byo banshimikile, mulumba mutanshi wa mabwe wajinga peulu yajinga nenge yalepa; bya bubiji byajinga byachibaulwa mu bipimvwa bicheche bya nsono; kabiji kya busatu kechi mwajingapo nenge, nangwa pachechetu ne. Oo, ami!

Byaalo bibena kwabana, Isalela ubena  
kubuka,  
Biyukilo byo baambijile jimo bangauzhi;

<sup>260</sup> Ee, mwane. Byonse byaenda kufika kwi atweba, mulongo, nyenga. Kika byobyoy? Pa myaka icheche yapitapo, bakaya bisela muntanda kechi baubapo byo booba ne. Pa mashikopo peeya jishimikila ja *Aya Mizhilo Jikumi* ja kwa Cecil DeMille. Ponka pa mashikopo peeya bumi bwa Yesu Kilishitu kupichila mwi *Ben Hur*. Ponka pa mashikopo peeya *Awa Funji wamasabi Mukatampe*, kwaluluka kwa Petelo. Kabiji ne onse o makayo a bupopweshi, abyo bakaya bisela bakana, ne kubikamo biko, kabiji ne kwibitaya. Bino, Lesa, mu bulume Bwanji bukatampe, wikikajipila bingi, musangotu umo.

<sup>261</sup> Ponka pano, abye bintu byaambiwepe myaka icheche yapita kunyuma, kamulanda, kalume mucheche wikepesha, aye mwine, wa Lesa, Naambile mba, “Kuji Kyeya kyaimene ne kwaamba kwiamiwa, kabiji kyambunjile bintu byakuuba.” Bantu basekele ne kwaamba mba, “Aye mu mutwe wani mwalubakanako pacheche.” Kuji kipikichala Kyakyo. Sayaasi Ikikopele. Kiji konka. Kya Bukine.

Naambile mba, “Awe mwanamukazhi wamvwetwa na kivule kya lufu.”

<sup>262</sup> Abo baambile mba, “Kimvule, pano, akyo kechi muji maana ne. Aye wikilengeletu mu milanguluko yanji.”

<sup>263</sup> Kuji kipikichala kyakyo. Lesa ukalengela mabwe kujila. Aye wakonsha kuuba byo Akeba kuuba.

<sup>264</sup> Yesu, myendeleko na mambo a Kyambo. Awa wa Bulesa Mwaana wakwa Lesa waimana popa, Emanuele, myendeleko ya byepi! Lekai mubi wabula kwitabila Amukase, ne kumushipila mate mu kilungi Kyanji, kabiji bandose myevu yanji, kabiji tumone kana Aye wakonsha kubapo kintu kimo. Myendeleko na mambo a Kyambo! Uu-uu. Kika? Pakuuba mba afikizhe Kyambo kya Bashaji. Oo! Bino, vulukai, Aye wafwainwa kuchichika ku myendeleko ya lufu. Lesa, Wakonsha kubula kufwa ne, kabiji ye Yenkatu wakonsha kufwa pakuuba mba apulushe ndengamambo. Kafwako nangwa umo ne, kafwako muntu wa bubiji nangwa wa busatu, wakonsha kwikyuba ne. Lesa Ayemwine ye Yekatu wakonsha kwikyuba. Kabiji apo byo Ajinga.

<sup>265</sup> Aye waambile mba, “Kechi kujipo muntu umo wakajijile ne kana Yenka wakukulukile panshi, yenkatu Mwaana muntu uji Mwiulu ponkapano.” Amena.

<sup>266</sup> Baambile mba, “Bashakulu betu bajilenga manna mungyetu.”

“Kabiji bafwa,” Aye byo aambile.

“Kabiji Obewa waamba mba Obewa wi Shinkwa wa Bumi?”

<sup>267</sup> Aye waambile mba, “Kasa akyangye kwikalako Abulahama, AMIWA NSAJIKO. Amiwa ne Shinkwa wa Bumi. Amiwa YAMI JIIPO.”

<sup>268</sup> Baambile mba, “Obewa kechi uji na myaka fifite ne, kabiji ke wambe mba Obewa ‘wamwene Abulahama?’”

<sup>269</sup> Aye waambile mba, “Kasa akyangye kwikalako Abulahama, AMIWA NSAJIKO.” Kabiji pano waleka bandengamambo bamukasa Aye, kipwilo kya dinominesheni, bamukasa Aye.

<sup>270</sup> Anweba vulukai, mu juba japelako, akye kipwilo kya Laodikeya kya bunoshi, Aye bamulupwile pangye, kuboka, ba kipwilo. Mwamona po kiji pakino kimye nyi? Mwakonsha kumona kine kintu kyo Mbeni kujijila na yuwe musango?

<sup>271</sup> Kika Yesu kyo aswishishe bandengamambo kumukasa Aye? Kyajinga kya kufikizha Kyambo, ne kuleta myendeleko kwi Lesa, ne kufwa. Lesa wafwajilwe kufwa. Aye wafwajilwe kwikala mubiji, pakuuba mba afwe. Kabiji Yesu wayukile kyokyo. Aye wibabuujile pa kikyee. Aye waambile mba, “Onauna iye tepo, kabiji Amiwa kamusangula jibiji.” Kafwako muntu mukwabo wakonsha ku musangula ne. “Amiwa nkamushimukulula. Mu mooba asatu, Amiwa ke ibwezha ne jikwabo. Yo naunai; Amiwa ke ishimukulula. Byonka Yona byo ajinga munda ya jisabi, pa moba ne mafuku asatu, nanchi ne Mwaana muntu wafwainwa kwikala mu muchima wa ntanda.” Kabiji abo kechi be kikwatakenye ne. Mwamona? Myendeleko na mambo a Kyambo, Aye—Aye byo ajinga.



272 Pano, kusekwa kufika ne kulufu, pakuuba mba asanguke jibiji ku Bumi Bwapeenape. Aye patanshi wafwaijilwe kwipaiwa, pakuuba mba Aye akasanguke ku Bumi Bwapeenape, kabiji ne kuleta muntu yense (wajinga mu musango Wanji) ku Bumi Bwapeenape, abo bakonsha Kwikiswa. Mwamona? Aye waikele ke muntu, ekale ke Mukuzhi wamukipasha kyetu, kabiji wachichikile ku myendeleo ya kusekwa, kabiji ne kuletelwa bisela konse, nobe byonka balunda Nanji bamingilo byo baubilo kunyuma Yanji. Nobe Mosesa, nobe Nowa, nobe bonse bashala byo bachichikile kokwa kusekwa, Aye wachichikile ku kusekwa. Kika? Aye wajinga na Kyambo, kabiji Aye wajinga Kyambo. Ao oene mambo kyo Asekejilwe kukila pa kipimo. Aye wajinga Bulesa kabiji Kyambo Akyokine. Aleluya! Abyo byo bya Mulengele.

273 Yesu waambile mba, “Anweba bakafutufutu.” Waambile mba, “Anweba mushimika bilende bya bangauzhi, bino kasa muji anweba mwi babikilemo. Baishile na Kyambo kya Lesa, kabiji kechi mwibaketekajile ne. Anweba mwazhatwa pa bonse.”

274 Ku Phoenix, Lesa inge waswa, Nkapuma kyambo juba jikwabo, Amiwa kazhachisha kino kisemi na mambo akwipaya Yesu Kilishitu, kumupopa Aye ne jikwabo, Amiwa nkaleta luzhachisho ku yoya mbung’eno ya bamwingilo, Lesa inge waswa. Abo bazhatwa na Mashi akwa Yesu Kilishitu, pa kumupopa Aye jibiji. Ee, mwane. Kuzhachishatu bonse!

275 Petelo wibazhachishe, pa Juba ja Pentekosito. Aye waambile mba, “Anweba na maboko a bubi mwapopele pa musalabu Mfumu wa Bumi, Ao Lesa ye asangwile. Atweba twi bakamonyi.” Aye waletele luzhachisho.

276 Amiwa kaleta Kyambo kya Lesa, ne kuzhachisha dinominesheni ujiko yense, kabiji ne muntu yense uji panopantanda, ao wazhatwa na mambo a Mashi akwa Yesu Kilishitu. Lesa nkwashai kwikala ng’ambi Wanji pa joja juba. Amena. Ee.

277 Oo, bamusekelenga ne kumuba bisela Aye. Abo bamwendelekele Aye. Aye waiketetu Nakyo. Amena. Oo! Monai byo Aubile. Aye wajinga Mwaana wakwa Lesa, wamanamine lufu pakuuba mba epaye bubi. Aye waubile kyokyo. Ajo...Jo jonka jishinda jakwipailwamo. Kabiji Aye waubile kikyeye, kabiji ne kwikishinda, mambo bonse bashala byo baubile.

278 Mambo, bonse kunyuma bajinga bacheche ba Kyambo kya Lesa. Mambo, Yesu byo aambile. “Akyo—akyo Kyambo kya Nkambo kyaishile ku bangauzhi. Kabiji ng’anyi wa mwi abo,” Aye waambile mba, “bashakulu benu, bupopweshi bwenu bwa bu kabungwe, ye babujile kwasa mabwe ne kwipaiwa? Bang’anyi mwi abo batambulwijile bangauzhi? Kabiji mwabwela

mwashimika bilende byabo panyuma yakufwa.” Waambile mba, “Anweba mwazhatwa na mambo a kwibabikamo.”

<sup>279</sup> Kabiji Aye wibataile kishipi na mambo a bujimi bwa ming’azang’aza, kabiji bakalume banji baishile. Abo bebamanyikile, pakupezhako baambile mba, “Pano tusakwipaya ne mwaana, mambo ye nswanyi.” Mwamona? Oo, bazingijile byo bamwene kyokya. Mwamona?

<sup>280</sup> Bino Aye wachichikile ku myendeleo. Kabiji Aye wipaine Ayemwine, kutangijilwa kuya ku lufu, pakuuba mba epaiwe, alete jibiji Bumi Bwapeenape. Lukumo lwikale kwi Lesa! Oo, byo Namutemwa Aye! Kubwezhapo Bumi Bwapeenape ne kusangula mwaana yense wakwa Lesa, kupita mu nkulo, aba baimene na kyokya Kyambo ne kusenda myendeleo. Abyo ibyo.

<sup>281</sup> Inge kechi Waishile ne, Nowa inge kechi wasangukile ne. Inge kechi Waishile ne, Elaija kechi wakonsha kubwela ne. Inge kechi Waishile ne, Nowa inge kechi wakonsheshe kusanguka ne, inge Aye kechi waubile ne. . . inge Aye kechi waishile ne. Mambo, Aye wajinga yewa Mwanamukoko watongwejiilwe jimo, ao waishile na kusenda myendeleo pe Ayemwine, kabiji ne kufwila Kyambo kyonse kya Lesa akyo kyaambiwe, kabiji baabo bantu baoloka kyo baimejileko. Aye wafwaijilwe kwikala byo. Kafwako nangwa umu wakonsha kwikyuba ne. Lesa Ayemwine, kabiji Aye wayishile na kutola kifulo, pa kuuba mba Aye akuule ne kupana Bumi Bwapeenape ku mwaana uji yense wakwa Lesa ao waimenejileko Kyambo kimo kabiji ne kumanama myendeleo. Mwaana yense wakwa Lesa, kupita mu nkulo, awa wafwainwa kwimana myendeleo, kechi kwajingapo nangwa umu wakonsha kumukuula ne, kanatu konka kulwitabilo aye wamwene Mukuzhi ubena kwiya.

<sup>282</sup> Yoba Wamumwene. Yoba waimene kunyuma kokwa, kabiji baambile mba, “Oo, obewa windengamambo wabufyafya. Lesa ubena kukumanyika, mambo obewa ulenga mambo abufyafya.”

<sup>283</sup> Aye waambile mba, “Nayuka Mukuzhi wami uji na bumi. Mu moba akupelako Aye ukemana pantanda. Nangwatu mizambo ya mubikoba ya onauna uno mubiji, nangwa byonkabyo, mu mubiji wami Amiwa nkamumona Lesa.”

<sup>284</sup> Mukazhi wanji waambile mba, “Kika kyo wabujila kumufinga Aye ne kufwa ufwe?” Waambile mba, “Obewa ubena kumweka nobe kamulanda muyaji.”

<sup>285</sup> Aye waambile mba, “Obewa ubena kwamba nobe mwanamukazhi wabula maana.” Amena. Byo. Ajinga. “Nayuka Aye uji na bumi, kabiji Ukemana pa Juba jikapelako.”

<sup>286</sup> Inge Yesu kechi waishile ne, Yoba kechi wafwaijilwe kukulwa ne, mambo Aye wajinga Mwanamukoko waipailwe kufuma ku kintendekesho kya ino ntanda. Aye wayukile mpuzha Yanji. Aye wayukile kifulo Kyanji.

287 Ao oene mambo, Maliya watulukile kyokya kifulo, aja juba byo alupukilemo. Aye waambile mba. . . “Inge Na. . . Anweba inge mwajinga kuno, mulongo wami inge kechi wafwa ne.”

Aye waambile mba, “Mulongo obe ukabuka jibiji.”

Waambile mba, “Ee, Nkambo, mu lusanguko. Aye wajinga nsongwalume wawama.”

Yesu waambile mba, “Bino AMIWA yami lusanguko. Anweba mwikitabila kikyenyi?”

288 Aye waambile mba, “Ee, Nkambo, Naketekela mba Anweba yenu Mwaana Lesa wasakile kwiya pantanda.”

Aye waambile mba, “Kwepi ko mwamuzhikile aye?” Oo! Abyo byokiji. Um-hum.

289 Aye wikiyukile. Awa mwanamukazhi mucheche kechi waambilenga kyokyo ne. Aye wajinga na bademona sebeni bapangilwe kufuma mwi aye. Aye wayukile bulume bwa Lesa, bwakonsheshe kusenda bwitote ne binemenezhi ne bintu byonse, kufuma pe aye, akyo kyakonsha kusenda abya bicheche, mupashi wakwitemwa wa kusukuulu-mukatampe wafuminemo mwi aye, kabiji wamulengele kwikala kilengwa kipya. Aye wapangilemo badiabola sebeni. Aba banabakazhi bamuyukile byo Ajinga, aba ba mwitabijile Aye.

290 Abo bayuka Aye kyo akonsha kwibobila. Nanchi byo booba ne leelo, ne abo. Abo bekiswatu. Akyo kyo kintu kyalondelapo.

291 Abyo Aye byo aji. Waambile kyokyo. Kabiji Aye. . . Mwayuka kyamwekele. Oo!

292 Bonse bakamanamina kyonka Kyambo kimo, Aye wafwijile na mambo oka amotu. Aye ye Yenkatu wafwajilwe kufwa, pakuuba mba ekyube, mambo Aye wajinga Kyambo. Aye wajinga Kyambo, Kyambo kyasololwa. Bonse bakwabo bajinga na bibese bicheche, pakuuba mumwe mwajinga kuyula konse kwa Lesa, Mwiaye. Aye byonka byo Aaji ne leelo. Bahebelu 13:8, “Yesu Kilishitu ujitu pamo keesha, leelo, ne myaka yonse.” Telekai.

293 Amiwa mbeni kupwisha, kine. Amiwa nsakwikyuba, nafwainwatu kuuba. Amiwa napita pa kimye.

294 Aye kechi wanembelepo Kyambo kimo ne. Bushe waubile Aye? [Kipwilo kyaamba mba, “Ine.”—Waku.] Kechi wanembelepo kimo Kyambo ne. Kika? Aye wajinga Kyambo. Aye wajinga kika? Abya Byambo bya nembelwe, Aye wajinga kusololwa kwa kyokya Kyambo. Lukumo! Yii! Pano Naumvwa bingi bulongo. Aye wajinga Kyambo. Aye kechi wanembelepo kintu nangwa kimo ne. Aye wajinga Kyambo, akye Kyambo kyanembwa kyasololwa. Lukumo lwikale kwi Lesa! Aye ujitu pamo leelo, keesha, leelo ne myaka yonse. Aye ke Kyambo, Kyambo kyasololwa.

Mwaamba mba, “Abyo ibyo nyi, Mulongo Branham?”

295 Talai Yehoba waimana kokwa kunyuma ne kulenga mulaini wakilang'anya pa manyaki popa, kabiji ne kulenga jishinda ja Isalela ja kwendamo.

296 Monai Yehoba mu mubiji, waamba mba, "Mutende, zhindamaitu." Kimye manyaki kyo apuminenga kubitulu, amwa mu kipupu, kabiji ne diabola walakawilenga pa bintu byonse, byonka bya, Aye waambile mba, "Mutende, zhindamaitu." Kabiji kyamukokejile Aye; lubesha ne byonse. Aye wajinga Yehoba. Amena.

297 Awa yenka Yehoba wakonsheshe kwimana ne kusansa miso icheche ya kime, waleka yaponena pantanda kabiji yalengwa ke shinkwa, wa kujisha bantu.

298 Aye waimene ne kutola masabi faivi, nangwa, mabisiketi faivi kabiji ne masabi abiji, ne kujishamo faivi sauzande.

299 Aye wajinga Kyambo. Amena. Amena. Aye ye Kyambo, kabiji Aye ukatwajijilatu kwikala Kyambo. Kabiji amiwa ne ba munzubo yami, tukengijilanga Kyambo.

Oo, Amiwa mbena kukeba ku mumona Aye,  
kukeba kutala pa kilungi Kyanji,  
Akwa na kumwimbila myaka ne myaka pa lusa  
Lwanji lwa kupulusha;  
Mu mikwakwa ya Lukumo, lekai nsutule jiwi  
jami;  
Byonse byakusakamana po bikapita, twafika  
ku muzhi, kikupu na kusekela.

300 Oo, ami! Ee. Shikulai myendeleko ya Kyambo. Kuji myendeleko iya na Kyambo. Ikalai bulongo na Kyambo, kabiji nsendai myendeleko.

Twayai tulombe.

301 Yesu, nobe bufuku bukwabo, Nkambo, Najijile, "Anweba Yesu, Kika kyo mwakeba amiwa mba ngube? Kika kyo Nakonsha kuuba, Nkambo? Pakumona bibye bintu, kabiji byo twayuka kimye kyo tubena kwikalamo, kika kyo Nakonsha kuuba, Nkambo? Kika kyo Nakonsha kuuba?"

302 Nalombelela kipwilo kyami kicheche muno, Nkambo. Nalanguluka pa bang'onzi babacheche mu kimonwa, bintu byajingako; kabiji ne bang'onzi bakwabo, bajinga bintu bikatampe. Bino kwajinga misango yabo isatu, Nkambo. Pakuuba aba Bamalaika byo bafikile, kechi kwajingapo bang'onzi bashajile ne. Baluwe babacheche bajinga bawama bingi, Nkambo, bino Naketekela mba kuji kintu kimo kyafwainwa kumwekanyika. Lekai kyubiwe, Nkambo. Tubumbai kabiji ne kwitulenga mu jishinda Jenu. Atweba twi—atweba twi buchimba. Anweba yenu Mbumbi.

303 Pa buno bufuku bwatalang'ana na Kimishimishi, Nkambo, twasata bingi pa kya bupe kya Lesa, mambo Lesa wikipana kwi

atweba. Nangwatu bibye kikale bimo, byonka byo twaketekela mu michima yetu, mwaila byakuketekela byabutushi bya joja juba byo baeseka kubumba ne kwikilenga nobe—nobe kijilo, kijilo kya Kilishitu, bino atweba kechi tubena kwiya muyo musango wakwa Santa Claus ne bichi bya Kimishimishi ne—ne byakuwamisha wamisha. Bino tubena kwiya mu Jizhina ja Nkambo Yesu, mu kupopwela Lesa wa Mwiulu, ao waalwilwe kwikala mu muntu, bumuntu nobe atweba, kabiji waikela muno mwetu, mu kwitukuula; kabiji wamanamine bya myendeleko bya Jizhina, wamanamine myendeleko ya musalabu, kuleka kipamo kya butunshi kipaye Emanuele, pakuuba mba Aye etulete ku Bumi Bwapeenape.

<sup>304</sup> Yentu bang'anyi, Nkambo? Yentu bang'anyi, kyakuuba mba tukane myendeleko? Lesa, tulengai kwikala bashilikale bakonsa. Napana bibye byambo kwi Anweba, Taata. Byakonsha kwikala byabula kulumbuluka; wakoka ne kunemenwa nobe Byonji. Bino, Taata, futai babo bantu mambo a kwikala ne kuteleka. Kabiji lekai bulume bwaletete Nkambo yetu, ne Kumupana kwi atweba kuno amba ekale Mupulushi, mu ano moba apelako, lekai kibushe mupashi yense uji muno, Nkambo, na mambo a Kwiya kwa Nkambo Yesu ako kujitu pepi. Kikale byonkabyo, Taata.

<sup>305</sup> Bukai bakolwa ne bamanyikwa baji muno. Kasai michimayalajika. Nkambo, atweba tuji. . . Twapita mu bitu byavula, muchima wami uji na mikovu yavula bingi, Nkambo, kufuma ku mankondo akonsa bingi. Amiwa ne wakala wapitamo. Nkwashai, Nkambo. Amiwa nakabila bukwasho Bwenu. Kapepo alwe lufunjisho lonse lwaikelako kintu kimo. Naketekela mba byokiji, Nkambo. Nkwashai, Anweba Lesa. Kabiji kwashai kino kipwilo. Kabiji mwitupeshe, kyapamo.

<sup>306</sup> Peshai baana babacheche. Amiwa mbena kulanguluka pa bavula leelo, babacheche, bakamulanda balunda babacheche kechi bakonsha kutambula kintu kiji kyonse ne. Kabiji Na—Nalomba mba Anweba musakwikala nabo ne kwibakwasha. Bapai Bumi Bwapeenape, Nkambo. Akyo kyo kikatampe. . . akyo ke Bupe bwa Kimishimishi kyo tubena kukeba, ke Bumi bwa Yesu Kilishitu kutangijila ne kwikala mfumu mu muchima wami. Akyo kyo Mbena kukeba, Nkambo.

<sup>307</sup> Tupeshai, bonse pamo pakino kimye. Twapana bibye Nyambo kwi Anweba. Lekai bipunene ponse po byakonsha, Nkambo. Konse kuji michima yashikuka, lekai bilete kimye kyawama kya lupulukilo, mu Jizhina ja Yesu. Amena.

<sup>308</sup> Yense o. . . Baanga bamutemwa Aye? Ikalai lubilo lubilo pa bibye, nangwa byonkabyo? Oo, Amiwa namutemwa Aye! Amiwa namutemwa Aye. “Nkambo, kika Anweba kyo mwakeba amiwa mba ngube?”

<sup>309</sup> Kechi mulubeko kupwila bufuku buno ne. Mwayuka kyalumbulula Kimishimishi? Oo, *Akye* ke kya bupe bwami kya Kimishimishi. *Akye* kyo kyokya Kyambo. Nkambo, inge Nakonsha kwileka amiwa mwine, inge Nakonsha kwifumyamo amiwamwine mujishinda pakuuba mba Kyambo Kyenu Kikimweeshe, Akyo kine kupichila *mumwe*, akyo—akyo kyo kintu kyakila mukubaya kyo Nayuka.

<sup>310</sup> Pano Nalanguluka mba baji na bintu bimo byo bakeba kupana ku baana. Pano Amiwa nsakupana mpwijilo kwi Mulongo Neville. Lesa akupeshe.

Mulongo Neville.



*KWENDELEKWA NAMAMBO A KYAMBO KDE62-1223*

(The Reproach For The Cause Of The Word)

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Kuvumbi 23, 1962, pa Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2024 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)